



*John Carter Brown*




BOUND BY CECIL & LARKINS

22

FOR E. W. STIBBS





25:54

not in Zegano, Potin's  
(in Concursos Literarios  
En honor de Santa Rosa  
de Lima)

JOHN CARTER BROWN

ADMIRABILIS

VITA, VIRTUS, GLORIA

S. ROSÆ

à S. MARIA

VIRGINIS LIMANÆ

ORDINIS PRÆDICATORUM

primi ex Occidentis Indiis

AMOENÆ SANCTITATIS FRUCTUS,

S. CATARINÆ SENENSIS

ejusdem Ordinis, sed alterius Orbis,

SERAPHICÆ DISCIPULÆ

Ejusque Heroicarum Virtutum, mirabiliumq;

operum, non tam æmulatricis quàm hæredis

à P. M. CLEMENTE IX.

Anno MDCLXVIII. die xv. Aprilis

BEATIS

à S. D. N. CLEMENTE X.

Die XII. Aprilis hoc anno MDCLXXI.

*Ab ortu illius LXXXV. ab obitu LIV.*

Solemni Canonizationis Ritu

SANCTORUM CATALOGO

in scripta

Compendio enarrata

Iuxta exemplar Romanum

Cum facultate Superiorum.

Augusta Vindel. Typis Simonis Uzschneider.

1676.

## Pie ac Benevole Lector

**V**ariegati colore flores, etsi nullo odore præditi, ad eò nonnullorum oculos animumque capiunt, ut felices divitesque se reputent, si rarus mirèque pictus quispiam flosculus, brevissimo dierum spatio, eorum exornet hortos: cujus itaq; non animum rapiat colore candidus & rubicundus, odore gratissimus suavissimusque **PRIMUS EX INDIIS Occidentibus** Dominici hortuli **FLOS SANCTITATIS ROSA DE S. MARIA**. Rapiunt ille sanè celesti sua elegantia & fragrantia Summorum Ecclesiæ Pastorum Christi; in terris Vicariorum **CLEMENTIS IX. & X.** animos, quorum ille totius Orbis gratulatione & applausu Beatarum, hic Sanctarum fastis **ROSAM** Canonicè intulit. Quântum **CLEMENS IX.** Americanæ hujus **ROSÆ** sacro decore & odore delectatus fuerit, ex Apostolico illius Brevis Gubernatoribus & Consilio Civitatis Limensis directo accipe. sic habet:

Dilecti filii salutem & Apostolicam benedictionem. Quàm imbecilles, ac in rebus perscrutandis parùm felices hominum cogitationes, & judicia sint, ut inde quoque veritatis divinitus revelatæ beneficium magis agnoscere debeamus, omnibus penè temporibus & locis admonemur. Sed imprimis Regio ipsa quam incolitis, mortalium inscientiæ præclarum exemplum eximie suggerit. Quotus enim quisque fuit ex antiquis, aut etiam ante rem aperte detectam, ex recentioris memoria sapientibus, qui summa, uti certè tamdiu visum est, ratione, nec minori confidentia, non asseruerit, sub æstu zonæ torridæ habitari minimè posse, & paucos quosdam secus existimantes insanire non judi-

judicaverit? Quis in Terris inhospitabilibus, &  
rimio solis ardore deustis, Veris comites Rosas  
requisivisset? Utrumq; tamen esse planè verū,  
hodie nemo ignorat, nemo miratur. En RO-  
SAM vestram, aut jam potius cōmuniter nostram  
celestes heroicarum virtutum odores habentem, ac  
luminis ætheri coloribus, non illis quidem specie  
tenus apparentibus, sed veris, ac indubia miracu-  
lorum insignium fide probatis efflorescentem, è cœ-  
lo moniti super candelabrum Ecclesiæ extulimus;  
illamq; post oraculi Apostolici declarationem, in-  
comparabili cum lætitia publici consensus exce-  
ptam, non solum Urbis Romæ celebritas, sed etiam  
totius Europæ fideles Populi, Beatus in Patria cla-  
rè DEI faciem pervidentibus, debito cultu simul  
hilares atque compuncti venerantur, ampliores  
quoque (si Domino placuerit) honores commu-  
nibus votis expetentes. Itaque vobis dilecti filii  
valde gratulamur huiusmodi Primitias tam ex-  
imias istius Agri Dominici; cui, quòd eum adeo  
feracem, & spei bonæ plenum experimur, cò-  
magis & alacrius quicquid ab hujus Sedis auto-  
ritate & amore paterno nostro, etiam pro illius  
adhuc exquisitori cultura & feliciori proven-  
tu, rectè proficisci cū Domino poterit, usque  
benignè prolixèque præstituri sumus. Interim  
plures eodem respicientes gratias indulsumus,  
& insuper dona nonnulla adjecimus &c. Datū  
Romæ apud S. Mariam Majorem sub Annulo  
Piscatoris die 6. Novembris 1668. Pontifica-  
us nostri anno secundo.



Quæ planè insignem ac singularem Sanctiss.  
Pont. erga fragrantissimam pulcherrimamque  
ROSAM Limanam indicant affectum, quem &  
constanter continuavit illius honorem & cultū  
ampliando. Nam an. 1669. 2. Ian. ad instantiā  
Regis Catholici & Sereniss. Reginae matris eius,  
non obstantibus quibuscunq; elegit & declara-  
vit B. Rosam, utpote primum Indiarum Occi-  
dentalium beatitatis florem in Patronam prin-  
cipaliorē Civitatis Regum, & totius Regni  
Peruani, cum omnibus prærogativis, ejusq; fe-  
stum in universo Regno de Patrona principa-  
liori ab omnibus utriusque sexus Christi fide-  
libus illic degentibus de præcepto servari, & si-  
cut alia festa de præcepto celebrari, ejusq; Offi-  
cium ab universo Clero tam seculari quam re-  
gulari de principali Patrona inibi recitari  
mandavit.

Ejusdem anni 1669. die 3. Novemb. idem  
Sum. Pontif. attendens quòd B. Rosa suo in  
Cœlis validissimo Patrocinio peculiariter fo-  
vebit suos de Orbe novo, & firmabit universas  
illorum Climatorum Regiones in fide Christi,  
ibidem recens plantata, elegit & declaravit  
eamdem in universalem & principaliorē  
Patronam, non solum Regni Peruani, sed om-  
nium & singularum Provinciarum, Regnorum  
Insularum, Regionum, Terræfirmæ, totius A-  
mericæ, Philippinarum & Indiarum, cum eisdē  
prærogativis, Officio & Missa, festo de præcepto.

Die 9. ejusdem mensis, & anni ad instanti-  
am

am Domini Marchionis de Astorga Catholica  
Majestatis apud S. Sedem Apostolicam Orato-  
ris, considerans quod B. Rosa jam omnium ubique  
populorum solemniter plausu devotissime hono-  
rata, utrumque tam veterem quam novum Or-  
bem sui odoris fragrantia in dies magis magis-  
que impleat, indulget & concessit universo Cle-  
ro tum seculari, tum regulari utriusque sexus,  
per omnes Provincias, Regna, Regiones, & do-  
minia Catholico Hispaniarum Regi & Augu-  
stissimo Imperatori, domuique Austriacae sub-  
jecta, quod perpetuis futuris temporibus quo-  
annis recitent de B. Rosa Virgine Limana Of-  
ficiū sub ritu duplici, Missamque celebrent.  
Denique universo Prædic. Ordini utriusque se-  
xus concessit quod Officiū de B. Rosa cele-  
bretur cum Octava solemniter, & in Martyrolo-  
gio Ordinis Prædicatorum ad diem 26. Augu-  
sti inscribantur sequentia verba ( quæ nunc ad  
30. ponenda sunt ) *Lima in Regno Peruano B.  
Rosæ de S. Maria Tertii Ordinis S. Dominici,  
quæ primus flos sanctitatis Indiarum Occidentali-  
um suavi Christi odore universam Ecclesiam re-  
creavit. Festum totum Duplex.* Diversis quoque  
in locis sub invocatione B. Rosæ de S. Maria  
erectis Confraternitatibus Indulgentias tribuit.  
Æquè eiusdem Rosæ miro virtutum odo-  
re affectus S. D. N. CLEMENS X. qui quarto  
Pontificatus sui mense cunctis Sacerdotibus  
indulget ut de B. Rosa votivam possint cele-  
brare Missam. Indulto quod sequitur:

Urbis

**VRBIS. ET ORBIS.**

*Beata Rosa de sancta Maria Virginis Limensis  
Tertii Ordinis S. Dominici.*

**C**rescente in dies mirabili Populorum devotione  
Cerga Beatam RorAM de S. Maria Virginem Li-  
mensiem ex Tertio Ordine S. Dominici, ac virtutum  
illius fragrantia sese latius quaquaversum diffunden-  
te. Sanctissimus D. N. CLEMENS Papa Decimus  
admissis Excellentissimi Oratoris Marchionis de A-  
storga instantiis, ex nomine Catholicæ Majestatis sibi  
porrectis, Universo tam seculari, quàm regulari Clero  
per totum Terrarum Orbem benignè induisit pro  
futuris perpetuis temporibus quòd de prædicta B.  
Rosa possit ubique in Ecclesiis quorumcumque, tum  
regularium, tum secularium celebrare Missam, per  
anni circulum, sive ex voto, sive ex libera devotio-  
ne juxta Rubricas ac dispositionem Missalis Roma-  
ni, tametsi nondum prædicta B. ROSA solenni Cano-  
nizationis ritu fuerit ab Universali Ecclesia inter  
Sanctas relata: Et ad hunc effectum, specialiter di-  
spensavit in decretis tum feli. record. Urbani Octa-  
vi, tum Sac. Congregationis Rituum & quibuscumq;  
aliis hunc Indulto quomodocumque obstantibus. Hac  
die 27. Augusti 1670.

**Mr. Episc. Portuensis  
Card. Ginettus**

**Loco ✠ Sigilli.**

**Bernardinus Cafalius Sac.**

**Rit. Congr. Secr.**

**Portò**



Porro cum examinatis & approbatis quatuor stupendis miraculis, implorato B. Rosæ interventu paratis, videlicet præsertatione à vicina morte Joannis Reilli, Candidæ Rosettæ, F. Seraphini Puglisi ex Ordine B. Mariæ de Monte Carmelo, & Angelæ la Cibasæ, in S. Rituum Congregatione decreverunt fuisse quòd S. D. N. quodcumque sibi alluberet posset tuto procedere ad Beatorum Ludovici & Rosæ de S. Maria solemnem Canonizationem, die 9. Octobris ejusdem anni ad proximam Paschæ solemnitatem eos Sanctorum Catalogo inscribere decrevit, uti eadem die Reverendiss. P. M. Generalis Ordinis Prædicatorum latissimis Encyclicis suis litteris universo Ordini denunciavit, ita scribens:


Revera hæc dies boni nuncii est, plus quam illa cui id nominis tribuitur 4. Reg. 7. Unde & nos sitacuerimus & noluerimus nunciare usque manè, scelus arguamur. Jam per alias nostras Encyclicas, seu Circulares, Vobis totique Ordini successivè notificavimus latos admodum (imo supra modum) felicissimos successus, quibus intra hos pauculos regiminis nostri menses Apostolica Sedes dignata est eximios nostri Instituti Sanctos præclaris honoribus condecorare: videlicet S. Petrum Martyrem Officio duplici de præcepto pro universo Clero, S. Catarinam Senensem B. Rosæ peculiarem & Cælo Magistram Officio Duplici, ac de præcepto in omni Choro Ecclesiastico; B. Albertum Magnum extensione anniversarii sui Festi atque Officii pro tota nostra Religione, B. Margaritam de Sabaudia solemnè approbatione rîus atque religiosi cultus, quo hæcenus inmemorabili tempore posita est apud suos Allobroges.

Et denique (ô miram, ô supereffluentem, ô adorandam Numinis clementiam) his omnibus in immensum tot gaudiorum fastigium propitiante eodem Clemente X. Pont. Max. accedit hodie irrefragabile decretum Canonizationis nostrorum BB. Ludovici Bertrandi

Valentini, simulque Rosæ de S. Maria Limanæ, quos  
ambos (favente cœlo) proximum Pascha Dominicæ  
Resurrectionis videbit ritu solemnissimo junctim il-  
tos Fastis Sanctorum; illum quidem velut Occidentali-  
um Indiarum verè thaumaturgum Apostolum; hanc  
verò ceu primum ex iisdem Occiduis Indiis fructum  
amænæ Sanctitatis, jamque Pontificio diplomate de-  
claratam principaliorem, & Universalem illius regio-  
nis Patronam &c.

Verùm & ipsa tanti negotii gravitas (uti in alia sua  
Encyclica pridie Idus Martii 1671. idem Pater Re-  
verendiss. toti Ordini significavit) & vastorum appa-  
ratuum multiplicitas effecerunt, quòd paululum ulterius;  
nimirum in Dominicam primam post Octavas Pa-  
schatis (quæ erat 12. Aprilis) hæc plurium Sanctorum  
splendidissima Apotheosis fuerit proroganda. Ea verò  
ubi adfuit auspiciatissima dies, Sanctiss. Pont. junctim  
cum Cajetano Thyenæ, Francisco Borgia, Philippo  
Benitio, Ludovicum Bertrandum, & Rosam Limanam  
(cujus hic compendio enarratam habes vitam) San-  
ctorum Catalogo inscripsit, perampla non solum Or-  
dinis Prædicatorum Fratribus & Sotoribus; sed etiam  
Confodolibus Confraternitatibus SS. Nominis JESU,  
& Rosarii, facta concessione Indulgentiarum quam  
Encyclicæ Reverendiss. P. M. Generalis Compendio  
Vitæ S. Ludovici, adjunctæ subscriptam  
videre licet.





# SPONSA CHRISTI

ROSA DE

# S. MARIA,

VIRGO PERUANA,

Tertij Ordinis S. P. Dominici,  
compendio enarrata.

## CAPVT I.

ROSÆ Natales, Indoles, Educa-  
tio, votumque virginitatis.

**R**OSA à S. Maria, Fløs delibatus  
terrarum orbis nuper inventi, Pa-  
triam habuit Limam Regiam Pe-  
ruviæ Urbem: Parentes Gasparem  
de Floribus, Mariam ab Oliva, stir-  
pe, non item opibus nobiles. Illam Mater an-  
no Virginei partus 1586. die Aprilis vigesima  
enixa est, felicissimo partu, solita cœteroqui in  
aliorum puerperiis mirè torqueri: & prodixit  
Infans secundis pelliculis involuta, veluti na-  
scuntur Rosæ. Isabellæ nomen inditum illi fuit  
ab avia materna Isabella de Herrera. Sed cùm

à matre, aliisque visa fuerit repanda Rosa insidere vultum trimestris parvulæ in cunis quiescentis, hoc aliud nomen à prodigio traxit, & Beatissima Virgo mystica Rosa iussit illam annis adultam à S. Maria cognominari, adeoq; prima forsân hæc fuit, quæ non solum divinitus nomen, ut alij, sed & cognomen acceperit. Eadem infanti Rosæ, quæ D. Catharinæ Senensi, indoles quieta, suavis, lepida: nunquam stridulis vagitibus turbavit ædes, ploravit nunquam, nisi cum semel in alienam dum illata ejulatu poposcit maternas latebras jam tum sibi gratissimas. Prodigiosum specimen heroicæ tolerantiae trimula exhibuit, namque dextero pollice ab arca, dum properè clauditur, fortè correpto dolorem egregiè dissimulavit, & manum abscondit matri eò properanti. Hilaris deinde sensit acribus remedijs totum ferè unguem absumi, & residuum lento, ac violento forfice radicitus avelli: attonito ad hæc Joanne Perez Chirurgo, qui tantillam Virginem gemere, aut expallescere nunquam vidit tempore acerbissimæ curationis. Et præcisa novaculâ vitiata pars auris, & caput, ob adhibitam improspere ab imperita matre noxiam medelam, bullis tumidum, ac fossulis profundè ulceratum, à quadrimula Rosa gemitum nullum, aut molestiæ notam expressit, cum tamen acerrimus dolor totum corpusculum identidem improvisa agitatione concuteret, & solidam noctem sub-

feri

feri cruciatus ardore voraci transegisset. Duos supra quadraginta dies, ut novam cutem induceret Chirurgus Virginem lancinavit, ac deinde sexenni ex intimo nare phaseolum tertio tractu demum exemit, obdurante in his tormentis Rosa mira constantia. Hæc rudimenta spinarum nostrum florem excoluere, ut gratissimum Sponso in ipsa infantia odorem exhiberet suavissimæ charitatis. Fortè puer virgunculæ frater inter ludendum lutó illius comam imbuerat, quod cum Rosæ, non contemptum, at sordes averfata, accidisset ingratum, scito, inquit frater concionatoris in morem, cultos puellarum cincinnos inferni rudentes esse, quibus illaqueantur incautæ animæ, ut in gehennam æternam derrahantur. Hæc verba Rosæ animi altius penetrarunt, & ad altissimam Dei notitiam vastissimæ illius menti aditum aperuerunt. Igitur statim exarsit in illa mirus conatus orandi, adeo ut nec dormiens cessaret à frequentibus precibus quibus perpetim invigilabat: Et jam tùm rapì se apertissimè animadvertit ad premenda heroica vestigia S. Catharinæ Senensis, qua duce quinquennis Rosa lilium virginittis Deo consecravitt sponsione solemni, & mox capillos in scia matre sibi abscidit ad vivam usque cutem. Divinus hic ardor puellam invasit sub ipsum usum rationis diluculum, ut asserunt illius animæ moderatores, qui omnes testati deinde sunt, nunquam illam à recto tramite

mite gravioris admissione criminis exerrasse.

## CAPVT II.

ROSÆ erga parentes mira obedientia, pietas, sollicitudo.

Quòd à parentum æquis imperiis non latum quidem unguem deflexerit Rosæ, sit ordinariæ virtutis; erit tamen prodigiosa, quòd fuerit divini humanique obsequij retinentissima, cum pugnantiæ inter se Deus, ac genitrix imperarent. Hæc filiam vexabat in dies, ut nativam oris pulchritudinem fucò magis intenderet; at illam alto muliebris mundi contemptu insultare seculi genio docebat Deus. Capiti aliquando circumdare compulsæ fertum vario florum genere contextum, illi ab ima parte suffixit oblongam acutæ, adeoque corollam capiti validè impressit, ut aliena manu contentis viribus fuerit extrahenda. Chirothecas, quæ delicatis candoris elegantiam augerent, induit iubente Matre; sed primò dirigit, amburi dein manus experta, flammæ etiam ex odoratis pelliculis promicare vidit, totum nocte intempesta cubiculum illuminantes. Ne ad nobilium fœminarum domos deduceretur, clam indico pipere, quod mordacissimum est, supercilia, & palpebras sibi obliniebat, ut arderent oculi, ruberent, stillarent, idcirco impares publicæ luci

fe-



ferendæ, potiorẽ ducens oculorum pupillâ similitudinẽ, quam tantò pretio emptam genitrix illi tandem indulfit, sicut & rudẽ ac decorem saccum ex obvia, viliquẽ materia, quam pro amictu induit, mirum in modum exultans. Vel ergo Matrem infimis precibus exorabat, ut sibi liceret cruentis divini Sponsi vestigiis insistere, vel mitia imperia ingeniosè eludebat: veluti cum jussâ, non lignis, at lana farcire cervical, læ vim tantam operosè stipavit, ut ligno caput videretur immitti. Quid quòd non Matri solùm, sine cujus venia nec bibebat, nec muliebres labores aggrediebatur, sed & domestico mancipio alacris obtemperabat? præcipuè verò cum ardua imperabantur. Cum Mater non rarò subirata veniam libandæ aquæ Rosæ denegaret, inscia, filiam nunquam bibere, nisi ipsa annuisset, in sex & plures dies Virgo fraudabat sitim. Hispidas aliquando pelliculas, quæ vim frigoris propulsarent, Rosæ manibus ex morbo contractis incauta mater admovit, addito imperio, ne illas abjiceret; toleravit obstinato silentio Rosæ plurimos dies mordacem pelliculæ ardorem, quo accensæ manus turgidis undique tuberculis ulceratæ sunt. Quin & post mortem à religiosi Cœnobij Præside jussâ Rosæ imago argentum diu multumquẽ frustra quæsitum mensæ superimponere, imposuit illicò, animante mortuos colores obtemperandi studio. Quæ verò cetera illius in parentes ob-



fervantia, pietas, amor? exhausta viribus ad mediam usque noctem laborem protrahebat, ut illorum egestati consuleret, & licet duodecim quotidie horas divinis alloquiis consecraret, tot muliebria pensa quotidie conficiebat, quot alia quævis celerrima vix quatrinduo: idque tanta elegantia, & cura, ut humanam artem superare viderentur; quamvis non raro dum flores acu pingeret, animo à sensibus avvocato divina intueretur. Ad hæc alebat in horto violas, ex quibus vānum expositis aliquod lucrum parentibus accederet: & Sponsum cœlestem aliunde miris, & arcanis modis supplere solitum, candidè confessā est religioso viro. At si fortè parentes ægri decumberent, lecto assidebat insomnis, parabat pharmaca, peragebat omnia operosissima Virgo ut solatium illis afferret. Hic præterire non debeo prodigiosam latitiam, quam ipsa moriens dolenti Matri, ac secum exanimandæ impetravit; tanta enim cœlestis dulcedinis ubertas maternum pectus inundavit, ut jurejurando facta sit, imparem se gaudio insolito perferendo plurimos dies jucundissimè laborasse, & hoc argumento manifestè assequutam, quantopere fluminis impetus exhilarans, civitatem Dei Rosam suam recrearet.




## CAPVT III.

ROSA, ut sequatur vestigia sanctæ Catharinæ Senensis, Tertio S. P. Dominici Ordini adscribitur.

**Q**ui sanctissimam Virginem Catharinam Senensem cum Rosa nostra componat, incertus animi sit, indicumne hunc florem, an ex Italia translatum in Peruviam dicat; usque adeo Rosa Catharinæ institutum vitæ, mores integerrimos, benevolentissimi Numinis dona, & ipsa tandem lineamenta vultus expressit. Conubij, cui nobili, & honestissimo destinabatur, spem amputare visa est excidio capillorum. Sed egregia formæ venustas, acre iudicium, suavitas erectæ indolis, elegantissimi mores sancto Virginis consilio adversabantur. Roseum illa candorem jejunijs deterere, nativam pulcherrimi vultus gratiam omni arte abolere, manus, quarum candor, & pulchritudo commendabatur viva calce amburere, ne hominum placeret obrutibus, domi latere: adeo ut aliquando Cantam deducta, locum metalli fodinis nobilem, quadriennio nunquam pedem extra limen extulerit, ne semel quidem videre dignata vicinū deliciarum hortum, aut percelebre spectaculum molium indicarum. Plures nihilominus invita accendit ambitu honestissimi thalami, ac præcipuo Matrona genere, & opibus clara illā uni-

co filio suo Sponsam optabat, & gratissimum hoc erat Rosæ parentibus, ac fratribus, qui nuptiarum nomine exanimatam, probris, conviciis, alapis, calcibus impetebant, veluti Lapa Mater S. Catharinam, cujus ad instar Rosa injuriis omnibus æquissimo animo devoratis, in S. Domini viridarium tandem insita fuit, adscripta Tertiæ sanctissimi Patris familiæ, licet illam invitassent cœnobia nobilissima, optarat S. Archiepiscopus Turibius, ab illa præcipuè sacræ domus, quæ tunc surgebat, fundamenta poni, Rosa studiosa sequi Seraphicæ Magistræ suæ Catharinæ Senensis Idæam, quam quinquennis elegerat, vitæ instituto, moribus, habitu repræsentandam, ne tamen suo consilio nimium tribuere, & parùm sapientum virorum arbitrio videretur, in viam se aliquando dederat Sanctissimæ Incarnationis Monasterium ingressura. At cum ultimum vale diceret Rosariano Sacello Deiparæ, visa est ut rupes adnasci solo, & frustra in pedes exilire tentavit, advocato sæpius ad opem ferendam germano fratre, contentisque viribus conniso; quoadusque decreto regressu ad domesticas latebras, alacritate mirâ surrexit. Et alio prodigio Deus ad premenda Catharinæ vestigia Rosam invitavit; nam ex papilionibus, qui colorum varietate mirabiles Limanum agrum pervolitant, unus nigro tantum, alboque colore pulcherrimè striatus, circumvolitavit Rosam, quæ divinum hoc esse respon-

sponsum intellexit, ut velut animo dudum agi-  
taverat, Prædicatorij Ordinistertium habitum  
amplecteretur. Ab illo semel induto vix non  
dimovit Rosam modestissimi animi demissio;  
nam gliscente ejus nominis celebritate, cæpit  
monstrari digitis, notari oculis, laudari à præte-  
reuntibus, ipsique D. Catharinæ Senensi non  
rarò comparari. Et meritò; nam adeò sanctæ  
Magistræ suæ virtutes induit, ut semel tacitè mi-  
ranti Confessario visa fuerit specie, vultu, linea-  
mentis sic transformata, ut viva similitudine  
ipsissimam S. Catharinæ Senensis effigiem re-  
ferret. Demum, quæ tam caro illi steterat, ve-  
stem constanter retinuit; nam dum latendi stu-  
dium illam seponendam suggerebat, ad aram  
Sanctissimi Rosarij flexis humi genibus inter  
orandum placidissimo animi deliquio sensim  
diriguit, visa ab adstantibus primò exalbescere  
pallore niveo, mox decora suffusione rubesce-  
re, demum toto vultu lucescere, ac scintillatim  
radiare: suoque colori reddita, erumpentibus  
ex animo prægestiente verbis, ostendit, se in  
hoc vitæ instituto divinitus  
confirmatam.



CAP.



## CAPVT IV.

ROSÆ mira animi submissio  
virgineus candor, benignitas, aliæ-  
que virtutes.

Fundamentum reliquarum virtutum, modestissimi animi submissio, tam altas in hac Virgine radices egit, ut suum unice contemptum perpetuo studio quævisse vita fuerit. Parum illi fuisset, domesticæ ancillæ officiis distineri, nisi & infra illam se demississet. Quamobrem sæpe Marianam agrestem servam adigebat, ut se dejectam humi pedibus proculcaret. Exultabat injuriis proscissa ob singularem vitæ rigorem, at suis laudibus vulnerata, spineam coronam, qua tempora clam obsederat, violento pugno capiti altiùs infigebat. A Regio Quæstore, qui supremis tribus Rosæ annis suam domum consecrari ambivit, flexis poplitibus aquæ libandæ veniam impetrabat. Morbos cælare consueta, ne medicæ sibi manus, & delicata remedia adhiberentur, aliquando tamen candidè fatebatur, quantis cruciatibus distabesceret, ut crederetur ob immania crimina à vindice Numine flagellari. Quin & mirari sit, cur nondum terra infelicem, quæ suis piaculis onerabatur, abyssò demerferit ultor Deus, sanctè affirmabat. Et enormium quidem scelerum ream illam credidisses, cum obruta lacrymis, & singultans procum-



cumbebat ad Sacerdotum pedes. Sed illa nunquam lethali crimine amisit hauftam à sacro fonte divinorum munerum ubertatem, & laborandum Confessariis erat investigantibus quid ad suum forum certò spectaret, nullum enim ab illius oré verbum excidit, obstreperū, criticum, nihil in ejus moribus triste, nil austerum; Sed tota serena erat, & benigna, adeò ut negasses Rosam esse, quæ spinis carebat. Cumq; integerrimo singulos amore complecteretur, à Dei hominumq; charitate animari videbatur. Nulla rerum humanarum cura ejus animum sollicitavit: quin interrogata aliquando, num qua re præter divinas delicias, innocuè caperetur, negavit se ullatenus posse rebus perituris exhilarari. At virgineum illius candorem nulla unquam veniali macula afflatum fuisse, nec in toto vitæ cursu, ne semel quidem illi in animum cogitationem obrepissè jurati asseruere undecim Religiosi viri, quotquot generalem Virginis confessionem exceperunt. Postquàm egregiam formam assiduis macerationibus, diuturna inedia, & aqua gelida toti corpori creberrimè superfusa, corruptit, magno haberi cœpit in pretio, utq; innocentissimum pœnitentiæ simulacrum ab omnibus indigitari. At illa blandientis famæ laudes horrescens, vividum illicò in genas colorem, vigorem in oculis precibus revocavit; adeò ut cum domum rediret sub meridiem sextæ feriæ sanctioris hebdomadæ roseo vultu

vultu instar Auroræ subvivida, & amœna, congregerrones quidam juvenes audacissimi in prætereuntem joci sint, quasi reducem in convivio, & opiparè habitam. Illa verò quadraginta elapsos dies pane tantùm, & aqua duraverat: & horas tunc triginta immota perstiterat in templo sancti Dominici precibus insistens, cibique omnis experta, ac potus. Majus illi studium fuit premendi reliquas divinas dotes, idcircoque Deum à teneris annis flagitaverat, ne cui mortalium sineret innotescere quæ suum intra animum operari dignaretur, cumq; illius votis annuerit Sponsus divinus, perpauca, & penè vulgaria crediderim, quæ ut maxima, & singularia, spirituales Virginis Patres ab illa expiscari potuerunt. Quid quòd Superos habuit ministros modestiæ suæ, & cum aliquando templum ingressam consternasset subita recordatio destituti in patenti cubiculo severioris ad domandum corpusculum instrumenti, designavit animo locum, in quo illud suppressum à Cœli Regina exoptabat, ut domesticos lateret, & regressa reperit famularem suæ demissioni præstitam operam à Superum Imperatrice.



## CAPUT V.

ROSÆ mira Abſtinentia , prodigioſa jejunia : Eadem tenerum corpus<sup>o</sup> ciliciis, flagris , catenis donat.

**L**aboraret , opinor, hiftoriæ fides, prodigioſa Roſæ jejunia recensendo , niſi Lector admoneretur , compendium hoc, quo ſanctiſſimæ Virginis vita delineatur, à remiſſoriali , ut dicunt, proceſſu fide bona extractum fuiſſe. Roſa proſectò per D. Catharinæ Senenſis veſtigia mirabiliter ad ſummum inedia culmen evaſit. Penè infans omni ſibi fructuum eſu interdixit, qui ſuaviſſimi in Peruvia naſcuntur. Sexennis tres hebdomadæ dies nil præter panem & aquam deguſtare cœpit. Anno verò ætatis decimoquinto ſe obſtrinxit voto nunquam delibandi carnem, niſi adigeretur illorum imperio , quibus non obtemperare nefas fuiſſet ; quod ſi aliquando fulminabatur , maximo ſtomachi ſupplicio pœnas dabat virtutis eximiæ, & non rarò naſcantem ardentiffima febris invaſit : quoties verò jam lecto defixam delicatis eduliis ad ſalutem revocare tentarunt, in manifeſtum vitæ diſcrimen adduxere; cum è converſo panis fruſtulum aquæ infuſum præſentiffimam illi ſanitatem ſæpenumero redonaſſet. Quod prodigium nulli admirationem incutiat, nam Chriſtus ipſam Roſam docuerat : velle ſe  
ab

ab illa rigidis abstinentiæ exercitiis constanter honorari. At Mater nimiam in exangui filiæ vultu maciem conspicata, hanc parsimoniam grande vocabat in crimen: Jussa proinde Rosa communi mensæ accumbere, ancillam rogavit, ut ex panis frustulo, & herbarum pugillo sibi pararet offam nullo sale conditam. Sed quas herbas sibi Virgo legebat, amarissimæ erant, & agresti saporis malignitate torquebant palatum. has illa è vicina sylva petitas alebat in hortostudiosè, cujus sub sepibus vasculum abdiderat vervecino felle plenum, & hoc cibos aspergere, & os quotidie summo manè solita erat imbueret. Granadillæ, quo in flore mirabili perennant instrumenta cædis divinæ, amarissimæ frondes dulcem illi, & quotidianum saporē elaborabant. Dubitari ergo meritò potest, duriùsne à talibus cibis, an ab ipsa inedia tormentum esset. Duplici se torquebat jejuniolum genere, & quo semel tantum in die renuē panis, & aquæ refectioem delibabat, & quo per totum diem, noctemque æpenitùs gustabat nihil. Primum ferè quotidianum præsertim ultimis vitæ annis religiosiùs ab illa servabatur septem continuos menses, à festo exaltatæ sanctæ Crucis ad usque Dominicam Resurrectionem. At ineunte quadragesima omnem sibi subtrahebat panem, solis malorum aureorum seminibus parcissimè victitans, iisque tantum quinque, dum sexta feria recurreret:

Re-



Reliquo anni tempore, quod octo diebus absumebat, vix unica die toleranda vitæ, sat esse credebatur. Unico pane, illoque sat exiguo, & aquæ vasculo quinquaginta dies aliquando transiegit, aliaque vice idem spatium decurrit ne guttulâ quidem aquæ recreata. Supremis annis trans mittebat complures dies sine omni prorsus alimento. Feria quinta se includens in domestico Oratorio, nec inde ad Sabbathum usque digressa protrahebat triduum omnino insomnis, impransâ, incænata, & uni angulo affixa omnino impositus ab illo, vel ad momentum surgere. Quid quod octo solidos dies nullum præter divinam Eucharistiam alimentum admisit? Vulgare sit aquæ ipsius haustu gustum fraudasse. Transactis hebdomadis quampluribus sine potu, & cæteroqui haurita non aqua gelida, sed plerumque calenti. Prodigiousum est plus vi-  
 rium à jejunijs accepiſſe, quàm à cibo, eò quod cum sua Magistra Catharina vulnerati Christi lateris ambrosiam degustabat. Prodigio quoque simile est, superiſſe in arido corpore locum, qui flagella, exciperet, sanguinem, qui verbera sequeretur. At nisi per Confessarios modus illi fuisset impositus, mortem nimius properasset ardor corporis castigandi. Postquam sanctæ Catharinæ habitum induit non contenta vulgaribus funiculis, duas sibi catenas ferreas aptavit in flagrum, quibus per noctes singulas ita se crucientabat, ut sanguinis rivi parietes, & pavimen-

mentum aspergerent, præcipuè ut scelesti meliorem ad frugem revocarentur quot flagellorum sulcis; quot vibicum livoribus se in dies exarabat, ita vulnera dispensans per diversas corporis partes, ut dum una coalesceret, altera feriretur, iterumque sæviret in primam vix dum coalitam, ab hac alterna, crudaque vicissitudine dirissimè cruciata. Horrebant domestici ex ædium parte secreta plagarum strepitum audientes latè sonorum, quique Rosæ animum moderabatur temperari nimitum rigorem iussit; sed illa infimis ab eo precibus extorsit, ut liceret sibi intra aliquot paucos dies quinque mille ictus infligere: serijs ab infantia præludiis ostenderat, quam avidè in hæc pœnitentiæ exercitamenta ferretur, nam & quadriennis sub crudorum laterum, & gravis trunci pondere sæpè laborabat, & Marianam ancillam precibus adigebat, ut se in horti angulo orantem gravissimis ponderibus oneraret, sub quibus æstuabat, gemebat, & interdum victa premebatur ad solum. At nondum quartumdecimum annum egressa sæpe nocte concubia perambulabat hortum nudipes, oblongam crucem lividis humeris gestans, nec illi tunc auræ malignæ intemperies, non frigora, non ventorum turbines insuaves erant. Iussà flagellis non ferrea catena se cedere, ipsam catenam lumbis triplicato circumductu validissimè adstrinxit, & sera commissuræ angulis immissa: clavem eò projecit, unde

redire non posset. Cum verò per extritam pellem in carnis, & nervorum profunda ferrum penetrasset, jamque conscriptum propemodum esset, nocte quadam acutissimus coxendicum dolor Rosam invasit, à quo, vires identidem accipiente, mox Virgo interempta fuisset; namque catenam vi nulla aperire poterat, diu multumque frustra luctata; sed illa confugit ad preces, quæ Cælum ipsum aperiunt, Et ecce sera sponte diffilit, laxatur catena, diducitur; avulsione tamen opus fuit, quam cutis, & cruor sequebatur. Ubi primum vulnera coiverant, suo se iterum tormento Rosa incinxit, sed catenam carni rursus adnatam sibi transmitti Confessarius imperavit, & illius aliquot circuli post Rosæ obitum conservati, mirabilem spirarunt odorem & omnibus peregrinum. Lacertis arctissima vincula circumdedit, quæ perpetim torquebant, musculos complicatos: pectus, axillas, latera morsu creberrimo vexarunt minutis fentes, & urticarum manipuli. At cilicium nacta ex acutis equorum setis dense contextum, infra genua productum, crassitie ferè inexplicabile, triumphavit sub illo rigoris paludamento, quod infixis undique brevissimis acubus in se violentius armavit. Hoc usa complures annos, & ob frequentem sanguinis vomitum alieno tandem imperio exuere coacta, saccum villis crassissimis gravem sibi in formam induit; aptavit, quo sub pondere æstuabat, rigebar, lassabatur

extenuata viribus Virgo, & pœna illi erat quicumque motus plumbea subucula prægravatæ. Plantis, in quibus tantum à vertice capitis erat sanitas, quoties domi clibanus accendebatur calcabat immota fornacis orificium, unde vehementior incendij vis erumpebat. Hisce deliciis demulcebat corpus, cui sat pœnarum afferebar, crebra ægritudo, exoptans etiam tentare majora, nisi vetuissent animæ moderatores. Quid quod neque delicias spiritus in corpus exundare sinebat, cavens, ac totis viribus obstans, ne divinis epulis animum saginantibus reficeretur; quod ego divortium sublimibus Rosæ operibus adnumerandum reor. Hoc unum solita erat reponere culpantibus nimium in se rigorem, si nerent ipsam, quando nil boni operaretur, saltem mala tolerare.

## CAPUT VI.

ROSA capiti aculeatam coronam infigit: ejusdem lectulus, cervical, nocturnæ vigiliæ.

**S**pineas spes Rosam decebat, quæ dies, & noctes hærens in flexili senticeto, quod Christi verticem insedit, in egressu pueritiæ ex ductili stanno sibi coronam implicuit, additis claviculis introrsus præacutis, & hoc diademate sibi caput incinxit non sine vulnere. plures annos duravit sub hoc spineto, quod tamen præludium



um solum fuit severioris tormenti, imminen-  
tis ex secunda corona aculeis nonaginta novem  
armata. Hanc postremos decem annos ad fi-  
nem usque vite prodigiosa constantia tolera-  
vit, neque enim sine spinca corona D. Catha-  
rina Senensis habitum induisse sibi videbatur.  
Argenteam laminam flexit in circulum, illique  
tres introrsus infixit aculeorum ordines, ita fir-  
miter suo quosque loco inhærentes, ut Aurifa-  
ber adhibitis forcipibus evellere nullum po-  
tuerit. Dentatum hoc sertum quàm dirè mo-  
mordit velatum puellæ caput, præsertim cum  
spinæ non omnes, sed aliæ post alias successione  
molestissima cutem invaderent, utpote ex varie-  
tate motuum in singulis vulnerum angustiiis  
obliquatæ. Sermo ipse Virgini dolorificus erat:  
quid si tussi concutiebatur pectus, si caput ster-  
nutamento exonerabatur? Sed hæc illi ludicra  
videbantur, ideoque ubi coronæ extrema coi-  
bant, vittas innexuit, quarum attractu dolorẽ  
intenderet, aculeos altius capiti infigens, neq;  
unquam eodem quo pridie steterat loco, fige-  
bat diadema suum, ut immitius pungeret inq;  
intacto pœnam renovaret. Sexta verò feria se  
profundiùs sauciabat, ad imum usque sinciput,  
& auricularum cartilagines coronam demittens.  
Diu Matrem, ac domesticos latuit efferum  
hoc tormenti genus, & artes quibus illud in  
se Rosa atrociùs irritabat. Sed cum aliquando  
se blandè interposuisset Patri quærenti ad vir-

gas puerulum filium, fortuitò errore in illius caput patris manus incurrit, ac tres illicò sanguinis rivos elicuit, ex quo coniecit Mater, qualis Erinaceus sub candido ejus velamine nidularetur. Quoties tartareus hostis Virginem aggrediebatur, ter illa digito pulsabat coronam suam, quæ validiùs fronti impressa certam ei victoriam asserebat. At post Rosæ interitum à sancto viro suaviata corona prodigiosum in illo divini amoris incendium repentè accendit, & odore suavissimo eundem perfudit. Ut autem spiniferum Sanctæ Catharinæ Senensis exemplar Rosa nostra secuta est, ita cum flores deessent, quibus de more virgineum demortuæ caput ornaretur, Catharinæ simulacrum suum illi diadema commodavit, in argumentum immortalis triumphi, quo excipi ab eadem Virgine, & à pulcherrimo comitatu deduci ad solium divinitatis, manu præferens palmam, & à Deipara corona decorari visa est à nonnullis probatissimæ sanctitatis. Sed redeamus ad pœnas, quibus Rosa triumphos sibi adornavit. Eam strati sui voluit esse duritiem, quæ somnū abigeret, non invitaret, imò idem lectulus, & equuleus esset. Vix obrepserat matri sopor, cum Virgo remota culcitra parte, cui incubuerat, in substratam tabulam descendebat. At capiti rude saxum supponere tamdiù perstitit, quoadusque ab irata Matre veniam extorsit suo sibi arbitrio lectum contabulandi. Truncus hic

fuit

fuit undique impositus, ac lapilli subvili stragulo dispositi, ut ea inæqualitate læderent corpus, cui leves tabulæ in deliciis fore timebantur. Postea verò tria ligna tortuosa, indolata, nodosa tabulis imposuit, ac tandem ligna omnino septem certis intervallis distinxit, ac tercentum præacutis regularum fragmentis intercapedines implevit, quorum mucrones obverterentur corpori, & in hoc prato quiescebat Rosa. Porro ad lectuli caput amphoram appenderat felle plenam, quo antequam ad somnum sese componeret, fauces recreabat in memoriam Sponsi felle potati. Cervical primò fuit crassioris panni volumen incommodum, crudus deinde later, mox lapis undique scaber. At à Matre iussa pulvinar adhibere, non illud lana, sed ingenti vi segmentorum infarsit. Lanam ingeri Mater præcepit: obtemperavit Rosa; sed lanæ vim tantam stipavit; ut ligneum cervical videretur, & sub parte, à qua facies decumbentis excipienda erat, tortiles juncos occuluit. Quindecim ipsos annos fugitivum soporem super horrible stratum, quod ultimo loco delineavimus, Rosa carpsit, sensu doloris tam effero, ut ad illius cogitatum, cæteroqui generosissima tremere, æstuarer, certa non inde se, absque omnium membrorum gelido stupore, ac veluti ex ossifragio surrecturam, Exanimem aliquando confirmavit Christus visibili, blandaque specie, duriorẽ fuisse dicens

Calvariæ lectulum, in quo pro illa cœperat mortis somnum. Tandem qui præerant Virginis animæ mitiùs illam ad soporem componi pro imperio adegerunt, abjectis saltem fragmentis regularum. Ultimis vitæ annis plerumque in humili sella collecto corpusculo noctem transegit, ex nocturnis frigoribus tremens, ac rigens. Et hoc novercale corporis odium illam edocuit, ut nec unquam vigil pulvino insideret, sed vel stans perageret labores suos, vel palo pro sellula uteretur. Sed nec morti vicinam destituit hic ardor durissimè cubandi. Equuleum suum frustra quæsivit: in nudo pavimento deponi non impetravit: at saltem lecticæ tabulis occipite, humerisque acclinis in duro ligno voluit qualitercumque commori Sponso crucifixo. Nec defuerunt, qui in morientis pallido vultu notarent ipsam Christi in Cruce expirantis effigiem, quod aliàs in Sancta Catharina Senensi animadvertum fuit. Quantum verò vigiliis dabat, cui lectus ipse soporem adimebat! Horas illas duas, neque semper integras somno indulgit, reliquum tempus ita distribuens, ut ex diurno, nocturnoque duodecim quotidie horas orationi seponeret, alias impenderet fœmineis laboribus, quibus parentes alebat, cumque inedia, cilicii, lectique carduetum, calidæ potus, profunda meditatio divinorum, vigilandi facilitatem ei comparassent; versutus tamen hostis illam



lam revocare nitebatur ad somnum. At Rosa, vel cervicem illidebat parieti, vel sibi tunde-  
 latera, vel prominentibus ex lignæ crucis bra-  
 chiiis fortibus clavis manus applicabat, & pen-  
 dulum corpusculum librabat in aere, vel oblon-  
 go, quem in cellulæ pariete clavum fixerat, mo-  
 dicum capillitium, residuum in fronte ob ob-  
 tegendam spineam coronam, implectebat ar-  
 ctissimè, & pendula, vix summis aliquando pe-  
 dum digitis terra insistens, clavis in soporem  
 pugnabat, de quo non satis adhibitis in lecto  
 tribulis triumphaverat.

## CAPUT VII.

ROSÆ domestica Solitudo, fuga  
 publici, cellula perangu-  
 sta.

**A** Prima infantia solitarios angulos domi  
 quærebat, procul à ludis puerilibus, ut uni  
 vacaret Deo. Crescente verò cum annis stu-  
 dio latendi, in horto sub umbrosis platanis, fle-  
 xili ramorum, palmitum, ac virgultorum cir-  
 cumductu modicum inclusit spatium, in quo ad  
 humile altariolum totas hærebat dies, adeo ut  
 domi abiverit in proverbium: hortum adeas si  
 Rosam quæris. At grandior impetravit à Ma-  
 tre aliud intra ædes cubiculum, in quo seorsim  
 ab omnibus pernoctaret. Molestissimum illi  
 erat in publico apparere, & nunc prece, nunc

lachrymis ambiebat matrem, ut optatissimam sibi solitudine indulgeret. Aliquando ad obsecunda urbanarum salutationum officia evocata, juxta domesticum furnum transiens, à clibani orificio saxum studiosè sibi attraxit in pedem, ut eo vulnere claudicans domi fineretur. Eo præcipuè nomine frequentiam oderat, quod suavis odor virtutum suarum commendaverat illam apud omnes velut illustris scēminam sanctitatis. Igitur aspirante Numine speculata est viam, qua se ab impedimentis viriliter explicaret. Coronam precariam ex coralliis, quam habebat in paupere thesauro, curavit Deiparæ Virginis collo circumdari, cui à Rosario nomen, & cultus est, ut hoc vinculo suaviter captivata Regina sua, Rosæ Matrem pertraheret, quò filiæ erat in votis. Post aliquot dies visa est corona à Virginis collo soluta pendere de manu parvuli Jesu, attonito ad hæc Sacrista, qui profitebatur, à nullo mortalium in digitos filioli fuisse translata. At Rosa tacita interpres divini consilii exultabat intelligens, desponsam sibi à sua Diva, quam gratiam optabat, & filium pro Matre fide jubentem, sponsionis vinculum in se transtulisse: ideoque voti secura flagitavit à Matre cellulam perangustam, in qua sine permissu illius, qui suæ animæ præerat, nullius conspectum admitteret, aut alloquium: Intra paucos dies perfectum stetit arctissimum in horto tuguriolum, quinque

que pedes porrectum in longum, quatuor in latum; ut ut angustum, sibi tamen, dicebat Rosa, sponsoque cœlesti sufficiens. Huic postquam se inclusit, cuidam probatæ sanctitatis sceminæ in raptu visa est sub specie lucidissimæ stellæ, cuius radios opaca parietum angustia cohibere non poterat. Hic perpetuos hærebat dies, per varia pietatis exercitia dispensans horas, ignara propemodum, in corporene degeret, an extra corpus. Cumque à nonnullis interrogaretur, cur non inde quotidie prodiret, ut Missæ sacrificio adesset, candidissimè respondit, domesticis curis distineri aliquando Matrem, sine qua domo prodire non poterat: sibi tamen à divino Sponso consultum, ut in cella residens complures quotidie Missas videret audiretque. Compertum deinde est, divinitus Virgini datum fuisse, ut spiritu, non secus ac si corpore præsens adfuisset, interesset omnibus sacris, quotquot in vicinis templis offerebantur. Prodigiosum porro fuit obsequium à culicibus exhibitum solitariæ Rosæ: Innumera illorum agmina soli hu, miditas, & arborum frequentia, aut gignebat, aut pertrahebat in Virginis cellam, amicum suo generi umbraculum, præcipuè ubi sub meridiem radii solis ardentes, aut sub vespertum serenæ noctis algores tenuissimis corpusculis immincebant: nec tamen in tot culicum legionibus, quibus scatebant undique parietes, personabat ostium,

ostium, fenestra implebatur, vel unicus fuit, qui Rosam unquam attingeret, cum è contra Matrem, aliasque religiosas fœminas ex permissio Rosam invadentes, hostiliter invaderet exercitus molestissimus. Neque tantum hospitæ suæ parcebant, sed ad illius imperium in omnia sese flectebant obsequia culices ingeniosi. Ubi primum Virgo reserabat Cellulæ portam: Eja, dicebat, amici, laudes celebremus omnipotentis Dei; at illi concentu lenissimo sparsi in gyros, arguta miscebant murmura, phalange tam ordinata, ac in se flexibus aptissimis redeunte, ut chorum credidisses, cui ratio dux præsideret. Cumque noctu repeterent hospitalem domum, rursus orantem Rosam gestiebat æmulari volatilis harmonia, & cum illa deinde sub lege nocturni silentij conticescere. Accidit aliquando, ut Catharina de Sancta Maria Tertij Ordinis S. Dominici, in Eremo domestica Rosam inviseret: hæc à culicibus fauciata, unum, quem sanguine turgidum vidit, occidit. At Rosâ miranti similis, cur hospites, inquit, meos trucas, nec tantillum animal tuo pascis sanguine, dum ejus conditor suo nos toties recreavit? sed in posterum tecum illi, ut mecum pacem colent. Huic auguris fides stetit, namque illi, aliisque pepercit in posterum culicum exercitus, adactus admirando Rosæ imperio. Franciscam verò de Montoia Tertiariam itidem Sancti Dominici alumnam à tribus tamen culicibus appeti in fan-

ctil-



ctissima Trinitatis honorem blandè permisit. Ultimo vitæ suæ triennio in Gundisalvi de la Massa Quæstoris regii domo parem fermè solitudinem sibi Virgo statuit, iussu à parentibus obtemperare viro religiosissimo, qui suas aedes Rosæ hospitio ambiverat consecrari: hic totas cum diebus noctes in domestico latebat Otorio, vel in ultimo ædium cubiculo, identidem regressa ad hortensem Eremum; perpetuo studio sequuta solitudinem, cujus amore tantopere tenebatur Magistra sua Catharina Senensis.

## CAPVT VIII.

ROSÆ cum Christo mira desponsatio, Pronuba Augustissima Imperatrice Angelorum.

**D**idicerat quidem Rosa Seraphicam Magistram suam Christo desponsam, sed vix audebat exoptare locum inter sponsæ comites adolescentulas. Interea tamen candorem Angelicum, & profundissimam dehiscentis animi submissionem adornabat, dotem scilicet, Sponsi divini amores rapientem. Prodigiiis ad mysterium præparata; & ad consensum erecta fuit modestissima Virgo, nam primò bicolor ille papilio, de quo verba superius fecimus, aliquamdiu per sinistrum Virginis latus cum oberrasset, constitit è regione cordis, ibique depictam reliquit imaginem cordis in veste Rosæ pulcherri-  
mè

mè delineatam, perinde ac si; Præbe mihi cor-  
tuum, Sponsus divinus clamaret, & Rosam in-  
signiret eodem emblemate permutati cum illa  
cordis ut olim cum Catharina. Nocte quadam  
speciosus forma præ filiis hominum videndum  
se Rosæ præbuit, & candidissimum illius amo-  
rem sequarere professus, innumeras Virgines  
splendido amictu nobiles ostendit, quæ caden-  
dis marmoribus distinebantur, ad illarum con-  
sortium Rosam invitans, inter sponsas suas, ar-  
duis virtutis operibus insudantes, adnumeran-  
dam. At Rosa veste gemmis, auroque distin-  
cta se repentè inclaruisse vidit, & ad cœlestem  
sortem elatam. Sed festinat historia ad mani-  
festum munus, quo Christus vigilem Rosam ad  
connubialem thalamum invitavit. Dies aderat  
consecrata triumpho divini Regis Hierosoly-  
mam ingressi, cumque palmæ distribuarentur  
in templo, sola Rosa præterita fuit à Sacrista  
properante, sive id casu contigerit, sive Numi-  
nis consilio singulari, ut virgo novitate confu-  
sa timeret, ne obliquo forsitan animi motui  
in scia succubuisset. Ad Deiparæ sacellum con-  
fugit, & genibus innixa per undantes lacrymas  
faucium cor suum effudit. Cum ecce Virgi-  
nem videt sibi sereno, mitique vultu adblandi-  
entem, mox in Filium conversam, & inde vel-  
uti fausto oraculo excepto in se rursus intentâ.  
Rosa ignoto percussa gaudio Puerum intuetur,  
qui pariter illi suavissimè arridebat, & postquâ  
ali-

aliquamdiu miro sensu voluptatis suam Sponsam perfudit, in hæc apertè verba prorupit: Rosa cordis mei, tu mihi Sponsa esto. At illa mirum in modum exultans, ac in sui nihili abyssura dehiscens, ancillam se dixit, paratam sui Regis ad nutus. Et Virgo Mater: vide, inquit, ô Rosa, eximium favorem, quo te Filius meus dignatus est. Exinde quibus gratiæ thesauris suam Sponsam ditavit Amor divinus! Illa quidem sapienti viro, qui ejus spiritus explorandi partes susceperat, pressius interrogata, dixit, verba sibi deesse, quibus munera liberalissimi Numinis in se immeritam collata explicaret. Ut autem perpetuò sibi versaretur ante oculos tantæ gratiæ monumentum, annulum poposcit à germano fratre suo, qui mysterii omninò inscius, perindè tamen ac si nuptiis interfuisset, eadem verba: Rosa cordis mei, tu mihi sponsa esto: annuli convexo jussit inscribi. Hoc Rosa sui amoris pignus in arca, in qua servatur divinum corpus, feriâ quinta sanctioris hebdomadæ à Sacrista claudi impetravit. At Paschatis die sponte, ac secretò redivit ad Rosam, non sine novo prodigio: namque propè illam innixa Mater, & ad omnia intentissima, nihil animadvertit. Post Virginis obitum vir sanctitatis fama conspicuus manu tenens annulum Rosæ, in mortalium omnium rerum exilium raptus, & miro voluptatis divinæ sensu colliquescens, Rosam vidit in excelso gloriæ fastigio inter præ-

præcipuos Cæli cives propè solum divinitatis, ac diù loco moveri, & protendere rigentem manum non potuit. Quod si hæc in aliena manu prodigia peperit nuptialis annulus Rosæ, quid ipsas nuptias in anima Sponsæ præstitisse putes?

## CAPUT IX.

ROSA perpetuo Orationis studio miram assequitur cum Deo unionem.


**A**Dhuc infantem divinus spiritus orare docuerat, eoque igne succenderat, quem nec ipsa nocturna somnia consopirent. Audita ergo per noctem sæpissimè est numeratò reddere preces, quibus per diem invigilaverat. Crescente verò cum ætate Religione, duodecimo anno jam Unitiva, quam dicunt, Orationis via Deo adhærebat. Porro duplex illi erat alloquendi Numinis ratio, tum enim soluto curis omnibus animo quietissimè se colligebat ad loquendum Deo: tum inter manuum labores, & extima opificia mentem nihilominus affigebat divinitati. Priori, ut supra innuimus duodecim quovis naturali die horas seposuerat; posterior illi perpetuus erat, nisi quando per horam horribilibus, ut mox dicemus, imaginibus torquebatur; adèd ut sive dormiret Rosa, sive vigilet, dum neret, texeret, sericos acupin-



geret flores, alios alloqueretur commederet, legeret in horto, in platea, ubique locorum ac gentium, perpetuò obversaretur animæ oculis suis amor Deus. Quodque omnem admirationem supergreditur, divina hæc præsentia ita Rosæ internas potentias occupabat, ut illam ab extimis sensibus non adeò detorqueret. Quo- circa respondebat appositè ad omnia, prosequ- batur institutum opus, ac domi satagens circa frequens ministerium in remoto cordis thalamo cum Sponsa deliciabatur: At inter orandum omninò torpebant illius sensus ad objecta, quæ ad se minimè pertinerent. Hinc in Templo de- fixis in aram oculis, nec prætereuntes videbat, imò nec si aliquid in pupillas incurreret, attra- hebat nictu supercilia; sed veluti rupes, immo- bilis, quo loco, situque ad orandum se compo- fuerat, eodem post horas, post diem integram, post solidum cum die binoctium invariata per- stabat. Ultimis verò vitæ annis à manè feriæ quintæ ad Sabbathum usque, nonnunquam ad Dominicam diem in domestico Oratorio perse- verabat, omninò impos de pavimento surgere. Tres præcipuè in singulos dies horas divina be- neficia recolebat: assueverat etiam altissimo ge- neri orandi, quo Dei attributa centum quin- quaginta mente pervolens, singulis proprium latriæ cultum exhibebat & hanc precationis formam terrori esse dæmonibus asserbat, cui dum insisteret tota ipsa movebatur systole cor-  
dis,

dis, atque diastolē. Familiārēs sermones, quibus alios alloquebatur, plerumq; sagittæ erant, quibus ferebatur in Deum: veluti hortum commendatura: Venustus est, dicebat, ac pulcher: Deus illi flores adaugeat. Illam omnia invitabant ad Deum, & aliquando ægram, & viles cibos, quibus se reficeret, adornantem, canens avicula in extasim abripuit, mortalium omnium oblitam, ad vesperam usque ab hora ante meridiem tertia divino amore vehementiùs æstuantem. Quid quod plantas ipsas, mutosq; stipites ad laudem, & adorationem Deo exhibendam Rosa mirabiliter inclinabat? Rem afferō inauditam. Summo manē cum ad cellam suam reditura pandebat horti januam, eminens conspectas arbores, virgulta, herbas, invitabat, ut secum benedicerent authori suo. Et ecce moveri subito ramos, collidi frondibus frondes, plaudere foliorum susurros, flores ipsos, ac fructices animari in musici murmuris harmoniam: altissimas arbores vertere solum profundæ adorationis ritu solemnī. Neque hoc Rosæ prodigium peregrinum, ac ratum, sed frequentia diuturna conspicuum. Et cœli volucres allexit in alternam adorandi Numinis societatem. Anno qui Rosæ ultimus fuit per quadraginta solemnīs jejunijs dies sole occiduo advolabat prope illius cubiculum avis mirē vocalis, quàm Virgo cantu provocabat ad laudes, divinas emodulandas. Illicō avicula inchoabat argutam har-

harmoniam, & sensim vocalior assurgens, tùm Virgini cedebat vicem, quæ voce tinnula, suavissimaque & ingenio prodigiosè sæcundo hymnos institutos prosequēbatur, perque integrū labentis horæ spatium alternabant cantum ea lege, ut concinente Rosa, volucris attentissima nec pipiret: vixque dato signo sextæ post meridiem horæ perfuncta officio, avolabat, postri- diè reditura. Alios porrò ad studium oratio- nis accendere omni cōnatu satēgit, præcipuè domesticos: & pios libros, quotquot de hoc ar- gumento verba faciunt, & legebat ipsa avidissi- mē, & legends aliis mira eloquentia persua- debat. Religiosos verò viros, qui sacras con- fessiones excipiebant, ac Dei Verbi Præcones obtestabatur enixè, ut ad orationem mentalem omni suadela, & arte mortales inducerent, ut usum piarum meditationum populariter inve- herent, ut ad frequentandas Dei laudes, præci- puè Rosarium magnæ Virginis percurrendum, omnes inflammarent: & mirum, quantùm hæc exemplum, & ardens hortatio Rosæ, divinum cultum ampli- ficarit.



Desolatoriis visionibus exercetur,  
ac horrendas alterius vitæ pœnas degu-  
stat. Doctorum examen subit, & ab illis mi-  
rum in modum probatur.

CUM ad altissimum gradum perpetuæ unio-  
nis cum Deo Rosa ascendisset, atrocia te-  
nebrarum intervalla pati cœpit indies, quæ so-  
lidis plerumque horis eò miseram deprime-  
bant, ut sæpè nesciverit, in Tartaro ne esset, an  
in diro carcere ignis purgantis: adeò nulla sua-  
vissimi Numinis recordatio, nullum solatij ve-  
stigium aderat menti. Accedebat pœnarum in  
cumulum memoria nebulosa præteriti amoris  
quo Deo adhæserat aliquando, at nunc eundem  
nec nosse, nec diligere se posse arbitrabatur, imò  
veluti peregrinum, alienum, extraneum, vixque  
de fama notum eminus, & raptum suspiciebat:  
videbatur muro adamantino obstructum effu-  
gium, ut nusquam pateret huius labyrinthi ex-  
itus; quare vix erat, quo ab æterna pœna da-  
mni suam infœlicitatem Virgo secerneret. Tri-  
ste solatium venabatur à spe proximi interitus,  
at tunc animæ immortalitas importunè occur-  
rebat, quæ illam æterno terrore miserè lanci-  
nabat. Per ipsos quindecim continuos annos  
quotidie semel in hanc desolationis caliginem  
demergebatur integra ut minimum hora: ite-

rum



rum tabescebat in malis, & Rosa tota jam spinem semetipsam fauciabat. Demum ea fuit horribilium figurarum acerbitas, ut Virgo tametsi ad quidvis ferendum impavida, unicum hunc amarissimum calicem à se transferri enixè petierit, nam durius illi erat ab amore Domini desinere, quàm interire; cum enim quod corpori est anima, hoc sit amanti animæ Deus, de-erat illi quotidie, abeunte Deo, vita nobilior. Vix tandem reperti Theologi, qui de hoc prodigioso mentis angore quippiam certi præsumerent definire. Fuere qui deliria, aut insomnia, qui lemurum spectra, vel demonum præstigias, qui fumantis atræ bilis paroxysmos interpretarentur. At illa omnia modestissimè devorabat, incusans inopiam ingenioli sui, quòd implexos animi motus explicare non posset. Nitebatur subinde similitudinibus adumbrare dolores suos; at si ignis nostri cruciatui conferrentur; ridendam esse comparisonem dicebat. Se longè à Deo sitam in regione dissimilitudinis, ob-  
rutam pusillanimitate spiritus, & tempestate, de qua loquitur David, Anathema sibi videri à Christo, veluti Paulus optabat: eum demum ab horridis illis imaginibus sibi dolorem inferri, qui millies vitam, animamque sibi rapuisset, nisi prodigiosè à Deo conservata fuisset. Creditur sancta Catharina Senensis aliquando idem perpeffa. De Beato certè Henrico Susone id compertum tradit historia. Sæpè illi erat an-

te oculos Christus Judex vultu asper, & horrendo tonitru intonans illud : Ite maledicti. At compulsa aliquando fateri num post tenebrosam eclipsim Sponsus illustraret animum suum, ingenuè falsa est, illicò totam simul animam collucescere, & inflamari, & in sinum divinitatis iterum volare; totam se transformari in Dilectum suum, immobiliter in Deo radicatum sibi videri, & illius gratia solidatam, adeò ut certò sciret, quod nihil unquam se à Christi charitate separet. Quamvis autem arcanum gratiæ lumen certitudinem illi indidisset, rectam semitam esse per quam ibat, tamen modestissima Virgo non præsumpsit recusare ferium, perque intervalla repetitum examen vocationis, ac spiritus sui. Præter illos, qui sacris illi erant à confessionibus, intimas ejus animæ latebras pervestigârunt alii, sapientia & religione singulares, tum è sacra sancti Dominici familia, tum è Societate Jesu, tum Doctor Joannes de Castil-  
lo sanctitate nobilis Vir sæcularis. Ibi post diuturnam, & sæpiùs iteratam quæstionem, hæc præcipè compererunt. A prima pueritia, Rosam cœlestes stimulos, & tranquillum orandi spiritum concepisse, adeò ut nihil illi dulciùs esset, quam loqui cum Deo, ac Divinis inhiare. Ad duodecimum usque annum ætatis se vario inter orandum tenore, subinde cum imbecillitate corpusculi, cum somno & mentis evagationibus luctatam fuisse, plerumque tamen animo libe-

libero, & quiete perrexisset in Deum, & ab illo tempore expertam ita se divinæ pulchritudini affigi, ut neque si spontè conaretur, aliò mentem detorquere posset, neque phantasmatum intercurfu, nec occupationibus sensuum exter-  
 norum divelli à complexu dulcissimi Numinis: radiare in animæ suæ penetralibus præsentiam propitiæ divinitatis, & hac deprehensa nulla se posse alia re oblectari. Interrogata, num quos de mystica Theoria legisset libros, negavit in-  
 ops Virgo, imò ne nomen quidem, si quod proprium esset hujus intuitivæ orationis sibi inno-  
 tuisse. Quæsitum ab illa est quanto sudore pugnaverit in pravas animi inclinationes; at il-  
 la, vix se meminisse talium certaminum, respon-  
 dit, & ab infantia propensione quadam innata complexam esse virtutem. Si quis autem in-  
 deliberatus motus nixus fuisset assurgere, re-  
 pente ex apprehensione divinæ præsentiae citra  
 conflictum evanuisse. Num quid solatii cape-  
 ret ex rebus creatis, quando animum contem-  
 plandi labore fessum nonnihil remitteret, inter-  
 rogata, negavit, se posse rebus perituris exhila-  
 rari, etsi ad momentum conspectum perderet  
 amantis Dei, id sibi videri atrocius quavis ge-  
 henna: horrendas porrò imagines, pavoresque  
 quibus illam diximus agitatam, statuerunt quæ-  
 sitores fuisse experimenta pœnarum, quibus in  
 purgatorii carcere torquentur animæ. Quando  
 verò nulla spes evadendi illi affulgebat, quodam

æternitatis fumo, & horroris inferni caligine obtenebratam fuisse; ne virguncula tam prodigiosis ditata muneribus aliquando superbiret, utque illius amor hoc igne purgatus vehementius inclaresceret. At adacta pro imperio aperire, qualiter sibi post illas inferni tenebras esset, suffusa rubore, quem metus ac pudor accenderat, dixit humili & intercisa voce: Plurumque post illas tenebras ostendi sibi humanitatem Christi, nunc virili, nunc infantili facie, sæpius & Virginem Matrem, & hanc diutius obtutui suo indulgeri: hinc robustum gaudium super omne gaudium, hinc experimentum cognitionis divinæ, hinc vitam & alacritatem omnium affectuum oriri. Denique post omnia sagacissimè explorata, hæc omnium quæstorum sententia fuit: Tutissimam esse viam, qua Virgo ambulabat, nullam hic subesse vaferrimi dæmonis imposturam. Aliqui Theologi præstantissimi auditis, quæ de Augustissimo Trinitatis mysterio, de hypostatica Verbi Divini unionione, de libro vitæ, ac prædestinationis, de natura Gratia, aliisque fidei secretis arcana promebat Rosa, neque par acumen illius fœminæ ingenio, neque ullam mentem liberalius à Patre luminum illustratam se cognovisse professi sunt, & manifestè patuisse altiores spiritum, qui in Virgine loquebatur. Præcipuè verò cœpit omnes admiratio, quòd ab infantia ad gradum unitivum ascenderit absque eo, quòd pur-



purgativum vix attigisset; quodque in horrendo illo tenebrarum tormento quasi certaverit cum Deo, tristiùsne ille affligeret, an illa veller affligi; adeoque non solum ferendo fuerit, sed & quotidie triumphaverit. Sanè apud omnes quotquot Limæ tunc aderant, & aderant multi consummatæ virtutis fama celebres, invaluerat constantissima opinio, Rosam spiritu Dei agere, & agi, & sapientia cœlitus infusa gubernari. Quædam Sanctitatis nomine celebris fœmina, sicubi cum ea concurrisset, flexis humi genibus repugnantem excipiebat, & eodem corporis habitu ad eam litteras dabat, ac ubi Rosa vestigium fixerat, gestiebat os & oculos applicare.

## C A P V T X I.

ROSA, cum Christo, Deipara, & S. Catharina Senensi familiariter, jucundè, assiduè deliciatur, domestica tutelaris Angeli consuetudine fruitur, variè luctatur cum dæmone semper victrix.

Non solum post internas animi nubes divini solis manifestus vultus Rosam exhilarabat, sed aliàs quàm sapissimè videndum se præbebat amantissimæ Virgini: dum sacros Rosa libros percurreret, parvus Amor vix digiti statura procerior obambulabat paginas passu

levissimo, & interim sereno, suaviq̃ue obtutu Sponsæ suæ blandiebatur: dum telas consue-  
ret, laborantis pulvillo quietissimè insidebat, arridebat ridenti, breves protendebat ulnas, velut offerens anplexum; omniq̃ue gestu, ac motu protestabatur amorem suum: has verò delicias frequentes Rosæ obtigisse, imò ferè quotidie, argumento est, quòd si ille tardebat, Sponsa querulis vocibus lamentabatur, utq̃ue amor Poësim docet, suas quèrelas familiari metro illigabat. Ex gutturis dolore aliquando laborantem Sponsus invitavit ad ludum, & victrix Rosa suos mitigari dolores poposcit, & impetravit. Divinus verò collusor jacturam non ferens ludum instauravit, & cum illi prospère alea cecidisset, & victoriæ præmium quæ-  
sivit, augeri tolerantiam Rosæ, ideoq̃ue primos illius dolores geminavit, Hoc dum blandè, modestèq̃ue narrat Matri, ne illa ob suam ægrimoniam contabescat, visa est aliquamdiu vultu Angelico radiare. Aliàs cum in horten-  
si cella nocte concubia viribus destituta fomento indigeret, sui lateris ambrosiam delibandam cordi Virginis Christus obtulit, uti quondam Catharinæ Senensi, cujus proinde Virginis non alumna solum fuit, sed etiam Collactanea. In illustris fœminæ domo post sancta colloquia de mōre secessit ad orandum, & septennis puella juxta Rosam vidit Puerum Jesum multicolori amictu indutum, & radijs

coruscantem. At in aliis ædibus Isabellæ Mexiæ visus est divinus infans confertis cum illa manibus in porticu obambulans miscere colloquia, hære in Sponsæ vultu, tanquam rerum omnium oblitus, & quacunq̃ne fixisset pedem, improvise lumine fulgebat pavementum. Quid quod mutui amoris adeo sollicitus erat Sponsus divinus, ut ne florem quidem in consortium venire pateretur. Invenit aliquando Rosa eradicatos flores, quos in horto studiosius alebat, & ob id dolenti Christus occurrit, ac dixit: An non ego flos campi melior quovis Paradisi floreto? Flos es, ac flores amas! Mihi tuos amores indulge. Ego illos eradicavi, ac projeci. An non hæc fidem faciunt visioni fœminæ cujusdam religiosissimæ, cui protestatus est Christus, à se Rosam gestari in penetralibus cordis, seque vicissim in ejus virgineo pectore tranquillissimè habitare. At Cœli Regina quàm frequenti alloquio, aspectuque Rosam dignaretur, vel ex hoc intelligi potest, ut paucis multa complectar, quod cubiculariæ officia illi exhiberet, manè Virginem à somno excitando. Illam à multo tempore destituerat necessarius somnus, cui conciliando moderatores animæ præcepere vespertinum lactucæ, ac soporiferorum seminum usum; sed cum vix hæc inducerent quietem dum instabat hora surgendi, cruciabatur Rosa, quod ad præscriptam horam evigilare non posset. Ergo Deiparam stel-

lam

lam matutinam vocavit in vota, quæ cum immineret hora surgendi, aderat conspicua, & voce nectarea dormientem compellabat his vocibus: Surge ad orationem, filia, surgenam instat hora. Cùm aliquando Rosa in lectulo confedisset, sed prægravante somni pondere in cervical esset relapsa, rediit Augustissima excitatrix, niveaque manu pulsavit dormientis latus, Surge, dicens, filiola, ne pigriteris. At illa vice Rosa abeuntem vidit à tergo Deiparam suspensis vestigiis, cujus aliàs materno vultu solita erat impleri, illam cominus intuita, uti falsa est, deque facie ad faciem. Ex quo semel à Christo data illi fuit Magistra Catharina Senensis mutua harum Virginum colloquia, tam amica, ac crebra fuerunt, ut veluti in Moyse vultum post divinum consortium sic ex vultu Catharinæ in Rosæ faciem lumina transiverint, quæ hanc illi per oris lineamenta propemodum assimilarint. Hinc apud omnes Rosa altera Catharina Senensis dicebatur, præcipuè ab obitu, cum illius facies in feretro videnda omnibus patuit. Cum tutelari Angelo domestica illi necessitudo intercessit, illum legabat ad Sponsum, si fortè hic hora consueta non adfuisset. Nocte quadam in Eremito sua sensit vires ex improvise languere; ideo rediit ad Matrem, quæ instantis deliquii signa notans in filiæ vultu, jussit ancillæ, adire subito vicinum propolam, & emere libum Indicum, quod Chocolatam vocant. At Rosa ro-



gavit Matrem, ut sumptui parceret, affirmans, sibi potionem illam non defuturam. Subirata Mater, Ancillam urgebat ad opus. Sed Virgo, mox, inquit, aderit è Quæstoris domo, qui calentem deferet Indorum ambrosiam. Et quis hoc noctis Quæstorem admonuit de imminenti deliquio tuo? addebat Mater. Cum ecce Quæstoris servus vas affert argenteum calenti Chocolata plenum. Attonita parens obedientiæ vinculo filiam adegit, ediceret, unde compererit, affore sibi remedium. At illa subridens, sæpè me, inquit, hujusmodi dignatur officis Angelus Tutelaris, illum misi, qui admoneret Quæstoris uxorem de medela qua indigebam. Solebat Mater ante mediam noctis horam aperire ostium horti, ut inde filia se domum reciperet. At quondam oblita cum esset, Rosa per fenestram Cellulæ suæ vidit umbram candidam motu decoro agilem, aspectuque non injucundam, quæ virginem, ut se domum versus sequeretur, invitabat. Agnovit illa sub umbra latentem Angelum suæ custodiæ destinatum, cumque illo se dedit in viam, ut ad horti januam pervenere, hæc ad umbræ tactum sponte patuit. Sed & aliorum Tutelares Angelos sibi ad nutum habuit obsequentes. Exemplo sit vir quidam è religiosa familia, qui peregrè profecturus Rosæ preces flagitavit pro itineris periculis divertendis; At cum diu iter tutissimum habuisset, in Truxilli convallibus gravia quæq;

per-

perpeſſus eſt, ac deinde Limam reſſus cum Roſa conqueri cœpit, quòd ſe deſtituiſſet: Virgo id accidiffe dixit, quia non ille tunc fuerat Peregrinus, qui eſſe ſolebat, & hominem admonuit de arcanis ei ſolummodò notis quæ non niſi Angelo internuncio Roſæ potuerant innotuiſſe. At quantum illam Sanctiſſimi Angeli amabant, tantumdem oderant furiaë tartaræ, quæ aliquando palam cum generoſa puella certarunt. Ingentis moloſſi forma ſemel in hor- ti cella per tenebras aggreſſus eſt Roſam malignus Tenebrio; pertentavit irritò morſu virgineum corpusculum, quamque diſcerpere non poterat, diù raptavit per ſolum, quouſque Roſa his vocibus: Ne tradas beſtiis animas conſitentes tibi, hoſtem egit in tugam. Fuit, cum ex inſidiis adrepens Cacodæmon improviſum ei colaphum incuſſit. Cum ſaxum in eam libravit eo conſiſu, ut euntem ad humum af- fixerit: Cum in ſecreta ædium parte orans Roſa, vidit in prægrandi Sporta teterrimam bel- luam licentiùs tumultuari, ac dèdignata quali- cunque ſolatio lucis uti candelam extinxit, & hoſtem in arenam provocavit. At ille Gigan- tea mole proſiliens per humeros corripuit Vir- ginem, ſtrinxit, contorſit, quaſi laceraturus ob- luſtantem: & omnia quidem puellæ oſſa com- molita videbantur, nervique diſtracti, at infra- ctus animus riſit furentem Cyclopiſ infaniam. Animadverſum eſt, frequentes hos Virgini fuiſ-  
ſe

se, agones, nec unquam formidinis ab illa sensum expressisse, quando feroci vultu animorum prædo irruebat. Sed aliquando cum in horto specie formosissima ac penè mutatus in Angelum lucis illi astitisset, & procum ageret, à nobili fuga victoriam quæsit illicò Rosa, & in propinquo porticu ferrea catena correpta nudos sibi humeros flagris. acerbissimis cruentavit, interque sanguinis, & lachrimarum rivos de Sponso conqueri cœpit quòd se tunc destituisset. At ille manifesta luce conspicuus Rosæ vultum exhilaravit, ac dixit. Ni tecum ego fuissèm, tunc victoriam reporrasses? Germana planè sunt hæc iis, quæ Sanctæ Catharinæ Senensi in certamine simili contigerunt, cui Virgini collata munera Sponsus in Rosam quoque congeffit: velut etiam mirabile donum inter noscendi sinceræ visiones ab illusionibus Sathanae, quo floruit à pueritia, at tunc temporis eruditè recensuit regulas distinguendorum spirituum ab effectibus, quos in anima pariunt: Has olim Christus Catharinam docuit, hæc Rosam, quæ summa adeò Magistræ expressit, ut si ad Indos accessisset fama erroris Pythagoræi de transmigratione spirituum, quamplurimi credidissent, Catharinæ animum in Rosæ corpus ingressum.

\* \*


ROSÆ persecutionibus, morbis,  
ærumnis pressæ prodigiosa to-  
lerantia.

**R**OSIS connascuntur spinæ. Nonum ætatis mentem attigerat, cum lactanti matri aruerunt ubera, reque angusta domi prohibente conductam nutricem, liquidiori pulte supplebatur lactis inopia, diducto parvulæ ore non sine cruciatu, sed sine lacrymis, quinimò Rosa sui pollicis inutili suctu tacita fraudabat famem. Vix pedibus ingredi cœpit, cum ob muliebrem Aviæ Matrisque de Isabellæ, Rosæque nomine controversiam, utriusque persecutionibus se vidit implicitam, excepta virgis ab avia, si ad Rosæ nomen, à matre, si ad Isabellæ, respondisset. Ut suavis erat indoles filiolæ, sic aspera conditio Matris quæ Rosam ob eximiam modestiam, perpetuas preces, ac sæculi fugam, non convitiis solum, alapis, pugnis, & calcibus, sed & nodoso baculo ex malo cydonio delumbabat, præsertim post grande crimen præcisi capillitij. Nec mitiores in eam domestici ob continuum commercium divinorum, & ferè nullum alimentum, quo patebat, humanis viribus eam vivere non posse, vocabant Rosam, in suspicionem fictæ sanctitatis, ei que minabantur, brevi rapiendam ad sacrorum Quæstorum tribunal.



bunal. Exultabat interim Rosa videns per ipsas Catharinæ vias ire se ad Sponsi unionem, & ab illustri fœmina interrogata, cur à Sera- phica Magistra sua non quæreret ab his ærum- nis effugium, (namque apud omnes in comper- to erat, Rosam quæcumque vellet, à Catharina impetraturam :) pluri se facere dixit, suæ Ma- tris dolorosa stigmata, quam delicata solatia, eò quod pueret Crucifixi sponsam, vel per mo- mentum cruce viduari. Et hæc quidem præ- grandis nunquam, aut rarò illi deerat; namque vacantem ab externa, cessantiq̃ue foris persecu- tioni agminatim corporis ægitudines succede- bant. Ex dira nervorum attractione trienni- um lecto decubuit cruciatu immensò, gemitu nullo. Mirum quot ex diversis, oppositisque causis in Virginem morbi irruerent, terni, si- mul, & quaterni, nullo supposito in exsucco, a- ridoque corpusculò ardoris pabulo. At non ab intemperie humorum, sed à benevola Sponsi manu, ut ipsa probè sentiebat, hisce agonali- bus bonis provenientibus. Sanè confessà est aliquando putare se nullum alicujus partis, aut membri superesse cruciatum, quem ipsa non senserit. At ne primus quidem im- patientiæ motus unquam obrepfit, qui affixam diviño beneplacito, vel latum unguem detor- queret. Cum angina, cum asthmate, cum i- schiade, cum pleuritide certandum illi sæpissimè fuit. Stomachi, pericardij, intestinorum dolo-

res frequentes convulsiones invehebant: febres, easque contumaces assuetudo verterat in jocū, non item articulares manuum, pedumque fidiculas, podagram, chiragram, arthritidem domesticam præcipuè familiam epulorum, quæ impransam, & incanatham Rosam frequentissimè infederunt. Illa inter extremos dolorum laniatus, benè sibi esse perpetuò dicebat, & Sponsum tantummodò alloquebatur his vocibus: Domine, auge, auge dolorem dummodo augeas, & amorem. Quàm verò suæ Rosæ precibus obsequeretur Sponsus divinus, ostendit mirabili, celeberrimaque visione, qua supra geminos arcus lucis immensæ, Christum librantem aurea lance hominum tolerantiam, suæque munera illis collata in præmium, aspexit, eundemque suum regem audivit elata voce commendantem pœnas. constanter ab hominibus devoratas; & asserentem non alia, quàm crucis scala ad cælum eniti homines posse. Tunc validissimus impetus Rosam invasit prosiliendi in forum, & ærumnarum pretium celebrandi, divinæque gratiæ, cujus mirabilem pulchritudinem, & vim, qua constituit animas deiformes, apertè viderat. Hoc præparavit Rosam ad ultimos paralytis dolores, qui præmaturam ei mortem intulerunt.



CAP.

## CAPVT XIII.

ROSÆ ardentissimus erga Spon-  
sum amor, variis indiciis manifestus: Im-  
petratum ab illa miraculum sudantis imaginis,  
ut Christum omnibus amandum  
persuadeat.

Quanta in hujus Virginis corde flagraret  
Æthna divini amoris, palam aliquando fe-  
cerunt splendores, & flammæ ab orantis vultu  
scintillantes. Visa non rarò est evibrare per os,  
oculosque lucidissimum ignem, præcipnè dum  
funderet preces. Ejusdem ardoris indices e-  
rant ignita suspiria, quibus perpetuò divinum  
cordis æstum ventilabat. Ardentes perpetuò  
precatiunculas jaculabatur in cœlum, quas o-  
peræ pretium esset hic apponere, namque plu-  
rimis ulu fuere non sine maximo divini amo-  
ris incremento. Omnia Rosæ colloquia, salu-  
tationes, responsa, amoris divini mentione  
condiebantur. Unicum illi solatium erat, de  
amore divino aut audire, aut loqui, omne aliud  
argumentum, comi dexteritate huc inflectere.  
Tunc Virgini aliàs taciturnæ præstò erat facun-  
dia mirabilis: fulgurabant oculi, & ex cordis a-  
bundantia loqui linguam manifestum erat. At  
cum in privato Oratorio solvebatur in preces,  
gratissimum erat audire invitantem singulos  
ordines creaturarum rerum ad amorem divini

Conditoris. Duabus ac tribus horis eidem in-  
sistebat, & clam audiebatur à multis, qui vide-  
runt arripientem non rarò pendulam è pariete  
citharam, tactuque chordarum temperantem  
imperum vocis, & excepta sunt hæc verba ab il-  
la numeris illigata.

*En inter Flores pulchrescis, & inter Olivæ  
Iesule, nec molli spernis adesse Rosæ.*

namque Matre Oliva, & Patre de Floribus na-  
ta erat. Vehementissimi amoris comes, ac te-  
stis zelus virginem adurebat, ideoque otiosos  
in templo fabulantes admonebat officij : Non  
erant domi, qui coram illa quiddam ineptum  
proferrent, veriti fulmina Virginis divinas in-  
jurias non tolerantis. A prima pueritia si for-  
tè audivisset sorores amatorium quid concinen-  
tes, uberrimo fletu testabatur dolorem cordis  
exulcerati. Lacrymas, quia unicè ad ærarium  
Dei pertinere didicerat, namque illis emitur  
cælum, nolebat aliò à quocunque profundo, id-  
eoque cum fortè vidisset Matrem plorantem :  
Quid, inquit, prodigis gazam Numinis thesauro  
referendam? Quotiescunque verò suum Deum  
ab aliis coli animadverteret, triumphabat im-  
menso gaudio, & aliquando cum redivisset ad  
cor scæmina è sacro Cænobio profuga, Rosæ  
miris lætitijs incessit, festumque diem egit, per-  
inde ac si totius Americæ sceptrum ad illam de-  
volutum fuisset : Deusque, ut Rosæ gaudium in-  
ten-



tenderet, ostendit ei sanctitatem insignem, quam adeptura olim erat pœnitens Sanctimonialis. Habiturus aliquando erat solemnem Concionem Confessarius Rosæ, quem repente febris invasit. Rescivit id Virgo, & precibus contra se invitavit Concionatoris febrim, futuriq̃ue eventus certa virum admonuit, præstò illi fore vires, se verò coquendam feberi non sua. Quod reipsa contigit Rosæ, ut olim sanctæ Catharinæ Senensi. Propagandæ gloriæ divinæ studio innumera excogitabat indies, quæ hominum pietatem accenderent: velut inter cætera novam artem conficiendi vestes infanti Deo, offerens pro indusio, fascia, stragulo, fimbriis, crepundiis, preces, jejunia, verbera innumera. Quod nobile inventum quàmplurimè amplexi sunt. Hanc autem sui amoris amplificandi sollicitudinem ingenti miraculo probavit Deus. Anno hujus sæculi decimo septimo, decima quinta Aprilis die, cadente Sole, Rosæ cum uxore, & filiabus Gundisalvi Quæstoris effusa in preces ante pulcherrimam Servatoris imaginem, vehementius amoris stimulis concuti cœpit, jamq̃ue nec voci temperare posse, sed erecta in pedes fervidissimè affari suum Deum, cumq̃ue obtestari, ut ignita pharetra excussa mortales omnes sui amoris telis vitalibus vulneraret: Cum ecce puella Quæstoris filia videt Servatoris vultum sudore madidum, in argumentum amoris, quo flagrabat amantissimus

Deus, quemque in Rosæ gratiam indiciis illis profitebatur, ut pares hominum corporibus flammæ accenderet. Mox puellæ mater, tum genitor, deinde Religiosi viri, tandem Angelinus Medorus, qui sacram effigiem coloraverat, aliique plurimi viderunt copiosas sudoris guttulas ad instar minutissimorum unionum tota sacratissimæ imaginis facie conspicuas lucere, ac prominere. Subnasci aliis alias, mutuoque attritu solvi in fluxum, ac diversis lineis per capillos, & collum decurrere, quoque detergebantur magis, eò magis erumpere, rivosque rivis succedere: & hoc ostensum supra quatuor horas produci, nullo colorum, aut venustatis detrimento: imò adaucta interim pulchritudine vultus divini. ChrySTALLINI humoris claritas, odor nullus, & alia quamplurima examina, palam fecere, non inesse humori pinguedinem aliquam ex coloribus oleo temperatis, sed omnes naturæ, atque artis industrias à tali prodigio longè abesse. Proscenium illud amoris divini reciprocos hominum amores invitantis Rosæ vota implevit: namque omnes, qui spectaculo interfuere, novis, acutis, insolitis divini amoris stimulis sub illius intuitu vulnerati sunt. Neque hic stetit miraculum, sed alterius partu suam certitudinem asseruit; namque Ros ipsa lapsu fortuito ad terram allisa graviter offenderat, adeò ut Chirurgi metuerint, aut mancā Virginem ea parte fore, aut curationis

remedium diuturnum incertumque. Rosa certa recuperandæ salutis, si gossipium divino sudore madidum brachio admoveretur, tamen cupida fruendi diutiùs doloribus suis, id non est ausa, nisi ex Confessarij præscripto. Tunc verò tractu prævalido sentit redire ad suam sedem distortos nervos, detumescere pulpos, distringi musculos: attonitis adhæc Chirurgis, qui de intractabili brachio, & in omnem medelam contumaci, jam propè desperaverant. Præter illa, quæ innuimus, Rosæ prodigia, imperium in belluas, arboresque, & in spiritus ipsos, intuitum cordium, & absentium rerum, manifesta alloquia præsentis Dei, prodibit brevi aliorum uberrima appendix, statim atque liquerit, ex lege sacrorum Rituum.

C A P V T XIV.

ROSÆ cum imagine Deiparæ familiare consortium: in divinæ Crucis signum Religio: Mutui honores, quibus illa, & S. Catharina Senensis se prosequuntur.

**A**Nte centum & ampliùs annos imago Deiparæ Virginis, cui à Rosario nomen est, Lismæ cultum accepit: Ex illo Roseto ver nascentis fidei in eas terras sese latè diffudit. Ad hujus aram Rosa perpetuò procumbebat in preces, mira lætitia gestiens, & suam Divam loquentē

varia serenæ frontis eradiatione , veluti quibusdam nutibus tam perspicuè percipiebat , ut nulla verborum facundia melius præstare id posset. In filioli quoque divini vultu velut animato libro responsa distinctè legebat, veluti si picta cerneret , vel multis characteribus exarata. Hunc deperibât : hujus ad intuitum novo calore perfundebatur, & gaudio , videbatur enim cœlestis Infans brachia foras protendere, veluti in amplexum Rosæ procururus. Fama erat illam omnia impetrare quæcunque ante sacram imaginem à Cœli Regina flagitaret, ac tanta securitate rerum eventus pollicebatur , quasi concessæ gratiæ diploma præcepisset. Celebatur in domestico Oratorio altera Dei parentis imago, in qua Rosa videbat omnia spirare, ac vivere, & aliquando cum pia matrona ante illam narraret prodigia, quibus Virgo in Atocha clientes suos à vitæ discriminibus eripuerat, Rosa prospexit imaginem edentem signa inusitata lætitiæ torquentem oculos benignissimo nutu, augustiùs radiantem. Porro sacellum Rosarij quovis die Sabbathi floribus exornare consueva, quos in horto educabat , nunquam hoc solatio destituta fuit , quamvis perfrigida rigeret, aut ardens esset anni tempestas. Sed pulchriùs induebat spirituali veste Reginam suam, tunicam, syrma, coronam , & alia ornamenta, jejunijs, inflictis sibi verberibus, & precibus innumeris componens. Præaltam crucem  
in



in hortensi sua cella extantem piis complexibus perpetuò stringebat: ubicumque divinum hoc signum incurrisset in illius oculos, pulsu validissimo sua præcordia agitabat, sive in fortuita trabium commissura, sive in decussatis sepium bacillis, in vestibus, in ipsis demum festucis, ac paleis occurrisset, illam sine attenta veneratione nunquam præteribat: Libanotim, vulgo Roremmarinum, alebat in horto, cujus tres, arbusculæ in crucis formam coibant: unâ ex his Proregina dono quæsit, sed apud illam cespes illicò exaruit, & idcirco Rosæ manibus iterum insitus, post quatuor dies pulchrior solito reviruit. Circumferre sanctæ Catharinæ Senensis imaginem quotannis solebat pium Soldatitium illius cultui consecratum. Cujus Divæ statuæ coronis, floribus, & multo fulgore gemmarum adornandæ Rosa quoad vixit destinata fuit, quo in munere temperare sibi à lachrymis, ab osculis, ab alloquiis præ ardore non poterat. Oh si præsto mihi esset pecuniæ vis non exigua, dixit aliquando, ut pulchriori amictu te induerem optima Mater: & ecce illicò adfuit, quæ ab illustri fœmina nummos attulit, Rosæ votis designatos. Visus non rarò fuit sacræ imaginis vultus insolito splendore radiare. Floruerunt ad imperium Rosæ caryophylli, quorum pridie ne nodi quidem apparuerant in florem erupturi: Ac tres vernarunt, quot sibi Rosa jussèrat afferri. Francisca de Mon-

toia, quæ sacrum Catharinæ simulachrum exor-  
naverat, Rosæ beneficio incolumis evasit ab i-  
gne sulphurato, qui oculum ipsius incurrerat,  
& resiliens incendit vestes alterius fœminæ,  
quam corripuit. Ipsiusmet Rosæ dexteram a-  
liquando horrenda arthritidis invaserat, adeo ut  
intumuerit manus mirum in modum, nec digi-  
ti loco moveri possent. Ut verò Seraphicæ Ma-  
tri suæ festivum habitum solito cultu compo-  
neret digitos forficum ansulis immisit, cum id  
fieri præ tumore non posset, & alacritate mira  
gemmas, torques, monilia in ordinem distri-  
buit, attonitis adhæc Regio Quæstore, illius  
conjugæ, & medicis, qui divinitus id contigisse  
professi sunt.

## CAPUT XV.

ROSÆ fervidus amor, & cultus  
in divinam Eucharistiam pro qua ad  
Martyrum se accingit.

**T**ER ut minimum in hebdomada divina  
Eucharistia reficiebatur, quinquies non ra-  
rò, & aliquando in singulos dies, præmittebat  
semper magno gemituum, & lachrymarum ap-  
paratu sacramentalem confessionem: pridè a-  
sperius cruentabat corpusculum flagellis, rigi-  
doque jejunio, & hospitio divino tam pretiosis  
ignitarum aspirationum odoribus cordis habi-  
taculum adornabat, ut si per totum vitæ spati-  
um

um illa tantum vice exceptura esset amantem Deum. At dum procumbebat ad Angelorum mensam adeò divini amoris igne flagrabat, ut facie præferret cordis incendium; hæc enim coruscabat adeò, ut Sacerdotibus terrorem incuteret: Cœlesti splendore sæpissimè perfusa, Angelica non rarò forma, radios etiam emittens apparuit religiosis viris: & ipsa Virgo à Confessariis jussa indicare mirabiles effectus, quos in animo suo divinum hoc Sacramentum pariebat, in singulis verbis hæsitabat, causata vocabulorum inopiam; tamen, immigrare se quodammodo, dicebat, in suum Deum, & gaudio tam immenso recreari, ut profectò nulla jucunditas mortalis vitæ comparari posset illi, quam mammilla Regum, pretiosum hoc convivium suam secum quodammodo divinitatem partiebatur. Accedebat robur, & saturitas prodigiosa, adeo, ut, cum sæpè dum templum adiret ex pridianis jejunijs, flagris, ac vigiliis fessà in angiportis hære cogeretur, divino resecta pabulo domum rediret alacri passu; præiret Matrem veluti si ambulandum sibi esset ad montem Oreb in fortitudine cibi illius. Ut verò corporis saturitatem à pastu Eucharistico acceperit, patuit domesticis; namque reversa domum ab epulo divino, recta festinabat ad secretum cubiculi, & ibi ad seram usque noctem inclusa perstabat in sponsi complexibus. & rogata cibum sumere pridiano exhausto jejunio, respon-

de-

Œbat : præ ingenti satietate à mensa Domini, alium se cibum admittere neutiquam posse , & aliquando per octo solidos dies altaris Sacramento pasta ab omni prorsus corporali alimonia, veluti Sancta Catharina Senensis, abstinuit. Tanta verò religione venerabatur hoc Sacramentum, tam ardentè amabat, ut quotiescunque illo recreanda erat, Missæque sacrificiis interesset omnibus à summo manè ad meridiem usque, ne vel ad momentum quidem oculos ab ara deflectens, aut supercilia unico noctu demittens, licet noti, ignotique ante illam transirent, & ferè in oculos incurrerent. Cum publica quadraginta horarum supplicatione adorabatur Sacramentum à populo, à manè ad vespèram usque inmutata prorsus hærebat innixis genibus Rosa, oblita prandij, nec aquæ una gutta resecta : sic per octo solemnes dies SS. Christi Corpori consecratos, sic ultimis quatuor annis, ubi feria quinta majoris hebdomadæ deduxerat ad monumentum Regem suum donec die parasceves ad tabernaculum transferretur nec noctu inde decedebat, affixa tumulo, toto viginti quatuor horarum decursu, nec sedere coram illo ausa, nec muro tantisper acclinari. Si cubi audisset ad divinum Corpus adorandum signa dari, cor, & caro illius exultabant in Deum vivum, & vividior in facie color accendebatur. Jucundissimum illi erat suis manibus aptare lintea, pallas, & quidquid textile ad sacram

Alta-



Altaris supellectilem spectat: pretiosos è filis sericis flores effingere, & in hæc opera conficienda, ne diurni laboris penso egestatem Matris fraudaret, noctis partem seponere. Denique pro Sanctissimæ Eucharistiæ mysterio vitam effundere prægestiit. Cùm Batavorum classis Peruvix littora popularetur, & ipsi jam Limensi portui immineret, imò etiam in arenam profuissse milites dicerentur, Rosa, cæteris exanimatis, mirum in modum exultans, in templo socias hortari cœpit ad subeundum pro religione martyrium, & facie rutilante, vestem, quâ longior in terram defluebat, alacriter præcidit cothurnos, exiit, ut in brevi hac veste magis expedita incurreret in hostes. Ex oculorum scintillis, ex impavidi vultus constantia, ex vivido tono vocis heroicæ animosa virago lænam induisse videbatur laceffens horam fatalem, & morti minitans pugnacissimè: Fervebat Virgini sanguis effundi avidus: cum auditum est, receptui Batavos cecinisse; & voto suo fraudata. Rosa torqueri cœpit ardentiori siti martyrii, cujus amore faucia, dolebat, se non illis temporibus natam, quibus gliscebatur tyrannorum furor in Christianos, & sæpè cum gemitu dicebat familiari Matronæ: Utinam idonea ratio, & modus occurreret, adornandi fugam ad barbarorū provincias, & ibi sanguinem pro Christo fundendi.

ROSÆ eximius pro periclitanti-  
um animarum salute zelus, & studium,  
consulendi corporali saluti proximorum  
supra modulum faculta-  
tum.

**Q**uoties ad interiora meridionalis Ameri-  
cæ montana flecebat oculos cruciabatur  
medullitus, illachrymans perditioni tot Barba-  
rorum: & cæteræ gentes Christianis legibus  
non exultæ perpetua illi erant materia laery-  
marum: Optabat visceratim discerpi, ac retis  
instar obpandi voragini, qua tot animæ infeli-  
ces ruebant ad Tartara: hortabatur Religiosos  
viros ardentissimis verbis, ut ad nunciandum  
Barbaris Evangelium festinarent: non hæren-  
dum, intonabat, in subtilitatum apicibus, in  
controversiis verborum: projici scholasticos  
labores, clamorasque disputationes, si tantis  
parta sudoribus eruditio proximorum saluti fi-  
dei que propagationi non impendantur. Asse-  
verebat, se nisi fœminam natura finxisset, decur-  
so studio literarum adituram fuisse ferocissimas  
gentes, quas vel in viam salutis reduceret, vel ab  
illis coronam acciperet mortis obitæ pro fide  
sanctissima: statuerat adoptare sibi pupillum  
inopem, & desolatum, quem in studio virtutis,  
& litterarū educaret ad laborem in conversio-

ne gentiliū subeundum. Uni ex Confessariis  
 suis incerto, an expeditionem ad Barbaros sus-  
 ciperet, obtulit dimidium operum suorum,  
 quibus Divinitatis amorem demerebatur, ut  
 alacrior ille ad excolendam vineam Domini se-  
 stinaret. Quæ verò illi cura fuit, & zelus peri-  
 clitantium Christianorum? pro his quotidie  
 cruenta sibi verbera infligebat, dicens, si quo  
 modo sibi licuisset fungi prædicatoris officio  
 opertam horrido cilicio, nudipedem, squallidam  
 interdium, noctuque se circumlaturam Crucifixi  
 Servatoris imaginem per fora, per trivium, & lu-  
 gubri clamore revocaturam ad cor homines à  
 recta via deerrantes: at divini verbi conciona-  
 tores fervida modestia admonebat officii, ut  
 facundia inani, & inutilibus floribus, ac thea-  
 trica ostentationis cothurno posthabito, ani-  
 madverterent, constitutos sese hominum pi-  
 scatores, qui flagitiosas animas eximerent ab i-  
 ma Charybdi vitiorum. Et exemit ipsa Rosa  
 nonnullas prodigiosè. Juvenem præcipuo ge-  
 nere, quàm moribus nobiliorem, qui amore  
 pulcherrimæ Rosæ succensus ac desperata spe  
 nuptiarum, quærebat saltem occasionem, qua  
 oculos pasceret illius venustate, ideoque Rosæ  
 Matrem convenerat, ut juberet à filia collaria  
 sibi aliqua ex pretioso carbaso elaborari. Ad-  
 vocata Rosa, ut statueret, quot ulnæ melioris  
 telæ, & undenam essent emendæ, divinitus edo-  
 cta secretum, quod corde premebat Vincentius

Mon-

Montefius Venegas ( hoc iuveni nomen erat , ) illum sanctissimis verbis ad virtutem incendit , adeò ut sobriam , & gravem vivendi rationem instituerit , singulis ad minimum octiduis divino epulo refici consuetus. Fœminam præcipitis iracundiæ , ad tractabile pacis ingenium , instituta de tranquillitate animi suavissima concione revocavit , adeò ut fateretur recordatione mansuetissimæ Rosæ sopiri , quascunque flammæ naturæ ignis accenderet. Religiosum virum cum morte luctantem , & formidine severi Iudicis trementem confirmavit , oblato illi de suorum exercitiorum qualicunque censu quidquid moribundo deesset ad supplendam inopiam meritorum , ab obitu conveniri se petens à defuncti anima , si fortè indigeret ulteriori suffragio. Et divinitus Rosæ innotuit , illum quamprimum regioni lucis adscriptam fuisse. Mirabitur protectò unusquisque pauperrimæ Rosæ funus publicis mendicorum eculatibus , ac lachrymis celebratum fuisse , vociferante turba egenorum , suam sibi nutricem ac matrem fato immaturo præreptam : adeò palmas suas extendit ad pauperes , cum his dividendo eleemosynas , quas insperatò receperat. Fuit cum octo dierum alimoniam sibi subtraxit , pro egentis cujusdam subsidio : cum triginta sex ulnæ candidæ telæ sibi à Matre attributas ad sudaria , vela , mantilia , omnemque candidi nitoris suppellectilem formandam pro arbitrio suo,



suo, secretò donavit duabus Virginibus, gene-  
 re, & virtute nobilibus, at pauperibus: fuit,  
 cum oblongum, & ad terram usque demissum  
 Matris pallium inopi cuidam Virgini donum  
 fecit, & Matri conquesta prædixit, pluribus il-  
 lam à divina bonitate ditandam. Stetit pro-  
 missis fides; namque post paucos dies ignotus  
 homo quadraginta libras argenteas pro pallio  
 coëmendo attulit Matri. Maria de Sala per fa-  
 mulum misit sericum subtegmen alteri confi-  
 ciendo sufficiens, & sibi oblatas ad hoc ejus-  
 dem materiæ totidem ulnas Limanus Prædica-  
 torum Conventus Rosæ matri destinavit. Nobi-  
 lem Virginem egestate, ac morbo pressam, pu-  
 rulentæ cancri peste nulli ferendam, intra pa-  
 ternas ædes recepit & medicas illi manus admo-  
 vit sedulitate tanta, ut brevi ad salutem revoca-  
 verit. Cujusque sortis, aut conditionibus pau-  
 peres scæminas morbis affectas in domum pa-  
 triam inferebat, neque tecti solum, & strati, sed  
 & medicinæ, ciborumque solatio egentes resi-  
 ciebat. Iis abstergebat purulenta ulcera, mun-  
 dabat vestes, lavabat pedes, nullo discrimine Hi-  
 spanos inter & Indos, Æthiopesque, nigros, &  
 candidos. Nulla ægritudo tam putrida, nullum  
 ulcus tam tetrum, cui Virgineas adhibere ma-  
 nus Rosa defugeret. Hac ambitione obibat  
 mulierum valetudinaria, & præ cæteris horridas  
 intuita, his eluebat vasa, parabat edulia, lectu-  
 lum componebat, nil dedignata, si vitiata sanies

pannis suis adhereret, quamvis cæteroquin munditiam amaret. Quinimò aliquando cum extractum è vena cujusdam famulæ sanguinem, post biduum seroso virore, flavis, nigrisque maculis, ac sanie ramosa decolorem stomachus horreret, secessit in angulum, & ad instar Seraphicæ suæ Magistræ, totum illum, virulentum cruorem ausu heroico sensim epotavit. Et Rosæ charitas morte fortior non rarè fuit, namque salutem redonavit agris, quibus ministrabat. Inter alios Joannes Almanfa nobilis vir decumbens impetrato Rosæ alloquio, in illius vultu majestatem Angelicam notavit: & hausta viva spe incolumitatis, solutus in somnum est, & integrè sanus evigilavit. Plura curationum miracula in aliud tempus differimus. interim addere libet, quòd vel ad bruta animantia Rosæ suavitas, ac tenera miseratio protendebatur. Erat Mariæ de Oliva Rosæ genitrici, miræ pulchritudinis pullus gallinaceus, cujus in tergore, & alis versicoloribus amœna plumarum varietas ludebat, & collum quædam veluti purpura incinxerat, adeò ut domi in deliciis esset. Sed cum jugiter cubaret humi, nec unquam visus esset in pedes attolli, nunquam auditus cucurrire, pertæsa Mater constituit illum jugulare, & mensæ comedendum apponere. Adstans Rosæ, Canta, inquit, mi pulle, ne moriaris. Vix verbum protulerat, cum sub oculis omnium repentè Gallus adfurrexit in pedes totum con-

cla-

clave prætumidis passibus perambulavit, & hilariter cucurrivit; repetita quindecies intra quadrantis horarij spatium cantilena.

CAPVT XVII.

**ROSÆ** magna in Deo fiducia,  
crebrò in suis suorúmque necessi-  
tatibus explorata.

**M**irificè afficiebatur verbis illis Davidicis :  
Deus in adiutorium meum intende : Domine ad adjuvandum me festina : hæc sedens, stans, ambulans devotissimè iterabat. Tria potissimum erant de quorum assécutione dubitare Rosam non sinebat cœlitus concessa fiducia certitudo : primum æterna sua beatitudo, alterum perpetua, & nunquam interpolanda Dei amicitia, postremum, certum ex alto auxilium in quibusvis necessitatibus, ac repentinis periculis. Semel concussa est pavida formidine, circa prædestinationis arcanum omni animæ tremendum, sed illicò Dominus sic illius cor est allocutus : filia neminem condemno, nisi volentem condemnari : igitur ex hinc tranquillo animo esto. Exinde tam invicta fiducia cordi Virginis inhæsit, ut interrogata à Doctore Castillo, an suæ salutis certam notitiam divinitus accepisset, fateri compulsa sit : superna illustratione tempestivè se didicisse, quod ab æterno electa erat ad cœlestem gloriam; quin et-

iam in ultimo decubitu cognovit ab omni purgantis ignis morā immunem sese futuram. Dum hortensem cellam incolebat, in mentis excessu vidit circa se undique solum conspersum rosæ, & miranti quonam pacto tam repentino vere regeretur terra, parvulus Jesus apparuit, & Rosam blandè compellans, jussit sparsas rosas colligere: Lectas illas divino puerulo attulit, qui ex omnibus unicam in donum poposcit, & Hæc tu Rosa es, dixit, cujus providam curam assumo: Intellexit illicò sapiens Virgo, quorsum tenderent verba sponsi, & gavisâ, teneri se in dextera veluti Rosam electam, sollicita quid agendum de reliquis esset, brevi consilio subitaneum inde fertum confecit, & cœlesti Infanti reverenter imposuit, qui mox suavissimè arridens disparuit. Pari certitudinis solatio fruebatur in securitate gratiæ, divinæque amicitæ, cùm cœlitus comperisset, in Sponsi favore se confirmatam, ut ne vel ad momentum dulci amicitæ fœdere posset excidere. Asseveravit aliquando animæ suæ moderatori, facilius imponendum sibi, quod palea esset, aut saxum quàm quod haberet Numen aversum. Eadem vis confidentiæ Rosam adversus quaslibet mortalis vitæ difficultates armarat. Nil metuens obvios tautos ferocissimos perstitit sapius in vestigio, matre fugam circumspiciente, spondens immanes belluas innoxie transituras; quod re ipsa bis contigit, non sine admiratione omnium



um, qui præsens Virginis exitium metuebant. Ut verò sperabat subsidia ad victum necessaria! Certior aliquando facta domesticæ penuriæ, quia panes nulli supererant, arcam aperuit & plenam reperit panibus ultra domus illius morem candidis, azymis, ac saporosis, testante figura inusitata, & peregrina, hos aliunde prodiiſſe. Alia vice mel defuit, necessarium illis regionibus condimentum: bis, ter, experti, fundo tenus exhaustum arceſcere vas, filij retulerunt Matri; at illa Rosam legavit, quæ cupam invenit usque ad supremum labrum recenti melle plenam; quod novo prodigio integris octo mensibus toti familiæ satis fuit in usum quotidianum. Gasparem Flores patrem Virginis premebat ægritudo corporis, animique inæror ob quinquaginta librarum debitum, cui solvendo non erat. Ut Virgo rescivit, fudit in Templo preces, & domum redeunti vir planè ignotus involutam strophio pecuniam patri necessariâ porrexit. Ejusmodi peregrinis subsidiiis pluries egena domus in gratiam sanctæ filiæ recreata fuit. Quinimò erga locupletissimum Sponsum ea fuit Rosæ fiducia, ut ausu liberali Virgo pauperrima frequenter, & palam in se receperit, providere de toto sumptu ad excitandum à fundamentis novum Sanctæ Catharinæ Senensis Monasterium, cuius erectio cœlitus promissa & ostensa illi fuerat, quodque tam seria fiducia spondit, ut Mater fastidio

impar, Rosam quasi manifestè delirantem ob-  
jurgaverit: Et ubi tibi sunt, diceret, bis centies  
mille libræ argenti! At illa fidejussorem, in-  
quit, habeo illum, in quo thesauri omnes. Sed  
hæc seorsum narrabimus.

### C A P V T XVIII.

ROSA divinitus cognoscit, ædifi-  
candum in Urbe Limana sanctæ Cathari-  
næ Senensis Cœnobium. Eidem salia complu-  
ra arcana Deo revelante pate-  
fiunt.

**F**loret nunc Limæ numerosum ducentis fa-  
cris Virginibus Cœnobium sub instituto  
sancti Dominici, erectum anno sæculi hujus  
vigesimo secundo ab Illustri, & opulenta vidua  
D. Lucia Guerra de la Daga. Istud integro  
ante foundationem decennio nunc per symbola  
& figuras, nunc manifestè in propria forma, &  
typo, fuit Rosæ divinitus præmonstratum: De  
illo tam securè, ac fidenter loquebatur, perinde  
ac si constructum ante oculos haberet: Desi-  
gnavit personas, quæ illic Deo famulaturæ es-  
sent, ac inter has propriam Matrem: numerum  
diffinivit, locum prædixit, futuræ ibidem fabri-  
cæ plantam, ac systema in tabella delineavit,  
primum incruenti sacrificij Mystam nominatim  
expressit, primam futurarum Monialium Præ-  
fectam ex vultu agnovit, spiritu suo imbuir, o-  
scu-

sculo pacis quodammodò initiavit. Nonnullis visa est insanire, cùm præcipuè Illustris fœmina, quam Cœnobij fundatricem fore vaticinata fuerat Rosa, superstitem virum haberet, & Matrem circumstaret soboles numerosa, quatuor nempe filij, & una filiola, & qui in se receperat curam exorandæ à Rege facultatis, Madrito Limã rediisset infecta re, & nulla spei lux in posterum affulgeret. Sed Lucix maritum, & paulò post filios omnes ab hac vita Deus evocavit, obstacula innumera, & potentissima disjecit, repugnantium animos ad favorem pij operis flexit, ac brevi stetit nobilissimus Parthenon, qui etiam nunc sapissimè Rosæ Monasterium, hoc est diu ante Rosæ vaticinio prænunciatum amat appellari. Hoc primùm fatidico animo percepit, cum aliquando lectas in horto Rosas cœpit non sine devotis suspiriis in altum jactare, & germano fratri supervenienti, & quærenti, quid rerum ageret, mysterium celavit; sed cœpere loqui prodigia; nam quas Rosâ in sublimè sparserat, hærebant in aëre, & in conspiciam sanctæ Crucis figuram aptissimè coibant, eidemque Cruci à succedentibus Rosis decorus per circuitum limbus formabatur. Agnovit Rosa Virgines illas esse, quæ in cruciformem arctioris vitæ Regulam coaptatæ è sublimi perfectionis statu terram despecturæ erant: Aliàs oranti fuit ostensum pulcherrimum pratum, liliis rosisque variegatum; quod in hortum conclu-

clusum, & à profani sæculi commercio segregandum certò cognovit. Testatus asseruit R. P. Villalobos Soc. Jesu vir sanctitate nobilis suo se experimento propheticum spiritum in Rosæ deprehendisse, quæ sui cordis arcana didicerat, velut etiam R. P. Philippi de Tapia Callaoensis Rectoris & Michaelæ de la Massa, Mariæ de Mesta, aliorumque: ita etiam res loco, vel tempore diffitas, intuebatur animo: diuturnam vitam spondit ægris quàm plurimis fermè jam in hora decretoria cum morte luctantibus: pueris, puellisque prædixit, quodnam vitæ genus ingressuræ essent: spondit, nonnullos religiosæ militiæ nomen datuuros, licet ab eo vitæ instituto alienissimi essent. Proregis animum immutandum vidit, qui molesto muneri nobilem virum destinaverat: Ferdinando germano fratri scripsit, orituram ex illo filiulam cujus vultum purpureus conspicuæ Rosæ character ornaturus esset, & illam innocentia singulari nobilem fore: advectam ex Æthiopia fœminā, quæ profitebatur, in Panama sacro se fonte lustratam, cognovit, neutiquam fuisse aqua saluari resperfam, & insperatis indiciis convictam ad meliorem frugem revocavit; sacro illa baptismo tincta est, ac postridie felix interiit. Qui Rosæ cordium arcana, & quæ ventura traherantur, ostendit Deus, eandem legendi, scribendique artem edocuit, ut olim Sanctam Catharinam. Tandem eodem Magistro suæ mortis



tis diem, locum, horam edocta, nemini dulci-  
ùs, quàm sibi, suòque funeri fortunata vates  
præcinit.

## CAPUT XIX.

ROSA mortis suæ præscia cum  
ultima ægritudine generosè luctatur,  
& sanctissimæ moritur.

**F**esta Divo Bartholomæo dies, quo se mori-  
turam præsciebat, pretiosa, & chara illi fuit  
& studio singulari quotannis culta: hinc suo  
non contenta jejunio, aliquot innocentes pue-  
ros induxit: ut secum in hujus festi pervigilio  
jejunarent. Mirabatur Mater quid filia tam pe-  
culiare cum sancto Bartholomæo verteretur,  
donec audivit à Virgine, hunc sibi nuptialem  
diem fore. Supererat adhuc Rosæ triennium  
mortalitatis, cum ex gravi morbo decumbens  
videbatur omnibus vitæ marginem attigisse; at  
illa omnium judicio complorata, certò asseruit,  
distare nimirum optatissimam metam, ad quam  
properabat. Annum denique suæ ætatis trige-  
simum primum ingressa, cujus ad exitum se non  
deventuram cognoverat, quatuor ante obitum  
mensibus optimè valens Gundisalvi Quæstoris  
Uxorem admonuit de tempore, ac mortis ge-  
nere, quo viam universæ carnis igradura erat;  
quinimò & locum designavit; in quo corporis  
vinculis erat solvenda. Didicerat ex celebri

visione arcuum, de qua supra locuti sumus, totam seriem immanium dolorum, quibus ultimò lancinanda erat, eosque acutissimos, & ad eò multiplices fore, ut singula exhausti corpusculi membra proprium equuleum essent habitura: siti eadem sese torquendam, qua in Cruce Redemptoris fauces aruerunt, intimas ossium medullas ardore intolerabili depascendas: Illa tantæ amaritudinis calicem nil expavescebat, in sacello Rosarij obtulit sese beneplacito divino, adeoque strenuè ad epotandum absynthium se comparavit, ut cordis ardor vultum vehementer accenderit, & satis constiterit tunc vicini sui obitus præcisam diem illi fuisse revelatam. Denique triduo ante fatalem ægritudinem adiit parentum ædes, vale dictura ibidem hortensi cellulæ cœlestium suarum deliciarum conscia. Hic olorino cantu mortem invitavit, & miris blanditiis S. Patrem suum Dominicum est allocuta, eique Matrem à se destituendam commendavit. Calendis Augusti sub vesperam sana, & vegeta suo se cubiculo incluserat, cum ecce sub noctis medium auditur miserabiliter ejulare: accurrit Quæstoris uxor cum filiabus, & ancillis, inveniuntque ægram toto corpusculo extensam per solum, rigidis sine motu membris; At illa interrogata quo malo angeretur, & vellet ne Medicum advocari, malum quidem se nullum habere dixit, sed ipsissimam mortem in intimis viscerum suorum

rum penetralibus liberrimè dominari ; cœlesti  
verò Medico tantum invisibili opus esse. E  
terra in lectulum sublata frigidus sudor stagna-  
bat in pallida fronte , luctabatur velut ingenti  
mole pressa respirandi facultas , tumorque ac  
tremor exangue corpusculum oberrabat. Sub-  
inde libero suspirio Jesu nomen tenerrimè  
pronunciabat, quod unicum illi erat solatium.  
Adfuere Medici, qui statim explorata vi pu-  
gnantium morborum, statuerunt, acervum tot  
cruciatuum humana patientia superiorem videri,  
neque dolores illos naturales esse, at calicem  
ipsum, quem Sponsus biberat, jamque misce-  
bat amantissimæ sponsæ. Et illa quidem à Con-  
fessario, verito ne ab humili modestia prove-  
niret Rosæ silentium, pro imperio adacta, ma-  
nifestè aperire quibusnam cruciatibus intabe-  
sceret, licet experimento morborum omnia ge-  
nera didicisset, hunc tamen utpote peregrinū,  
non nisi per similitudines potuit explicare, di-  
xitque: videri sibi candentis ferri globum per  
tempora adigi, à summo vertice usque ad infi-  
mam plantam dexteri pedis ignitum veru  
transmitti, & simili ardore transversim à sini-  
stro latere per meditullium cordis ab ignito  
pugione pervadi, à quo decussato ardoris tor-  
mento forma Crucis exprimebatur; viscera per  
frusta candenti forcipe evelli: caput inclusum  
candenti galeæ videri, & validis puncturis ceu  
malleorum ictibus contundi: ossa resolvi sen-  
sim

sim in pulverem, medullas instar cinerum aruisse. Fluctuantibus in mutuo aspectu confusis Medicis, Rosa clam suo Confessario aperuit, frustra illos in exploranda morbi specie laborare, cum totus præter naturam esset; quocirca unica sibi tolerantia opus fore, ut quoquo modo singulos Crucifixi Sponsi sui dolores experiretur: sinerent illam absque omni humano alloquio aliquot dies jacere, cumque Amore suo, cui se membratim confixam in cruce sentiebat, colloqui perpetuò. Præfixa Augusti dies interim illuxit, quam in Calvariæ monte, non in Thabor cum Christo transfigurato transegit; namque accessit sinistri lateris paralytis, perque consequentes dies pleuritis, asthma, ischiades, colica, arthritidis, denique continuæ febris ardor acerrimus. Usque adeò tota morborum cohors debuit incumbere, ut unica hæc Rosa fatali ægritudine solveretur, & articulatim moriens gloriosum ferè martyrium ab Amore Sponso illatum subiret. Placidissima tot inter cruciatus animæ quiete fruebatur, suosque dolores intendi, & uberiores pœnas suis criminibus irrogari flagitabat. Subverebatur Virgo sapiens, ne tot simul morborum continua, & atrox violentia sibi rationis usum eriperet, ideoque tremula voce, flebilique supplex obsecravit domesticos, secum orarent Deum, ut illi se infortunio eriperet: & divina pietas respexit humilitatem ancillæ suæ, & integrum



grum illi expediti iudicij , ac linguæ vigorem peculiari prodigio inter assidua exhausti cerebri deliquia servavit immunem usque ad extremum halitum; cum tamen sæpè inter hos angores ab usu exteriorum sensuum illam abdukerit, vel morbi violentia, vel contemplationum excessus. Incredibili siti torquebatur, cùmque bibere sibi per Medicos non liceret, amarum tolerantiaæ calicem ad inum usque fundum exhauriebat cum Sponso. Tenerrimam conscientiam exomologesi pluries iterata, ac semel de toto vitæ decursu sese accusans, quàm diligentissimè expiavit; ita ut procul audirentur gemitus, & suspiria. Triduò ante felicem transitum divinum viaticum, & sacrum oleum poposcit. Ut audidit epulum Eucharisticum sibi afferri, vívido colore suffusa coruscantis aurore instar gratiosè rubuit, mox gaudio suo impar in altissimam extasim dirigit, & suscepto divino Sacramento pallido & exangui ore fixa hæsit: At extremam unctionem tam alacri omnium officio moribunda excepit, ut verè oleum latitiæ fuerit, quo se potius ad triumphum, quàm ad agonis conflictum sensit animari, utpotè salutis adeò certa vt insuper nosset absque lustralis ignis contactu se recto itinere ad Sponsi nuptias profecturam. Sæpius elata, & sonora voce se orthodoxæ fidei filiam professâ est, ac sancti Dominici sobolem. Candidum ejus Ordinis interfigne, quod scapulare dici-

mus,

mus, continuè, & patulè ante se protensum volens. Exquisitis, ac summè efficacibus verbis veniam à Deo exoravit pro illis omnibus, qui in toto vitæ decursu molestiis, damnis, aliisque se injuriis affecerant, & Crucifixi parvum simulachrum manu stringens, satiari non poterat his verbis: Pater ignosce illis. Domesticos omnes acciri demissè petiit, & licet ex his neminem verbo, aut minimo unquam nutu offendisset, à singulis, & omnibus lachrymosa voce oravit condonari sibi, si in re ulli molesta accidisset: dolere quòd adhuc per biduum illis oneri esset futura. haud procul abesse horam, quæ domum Gundisalvi à fœtidæ Rosæ longo fastidio, inutilique pondere liberaret. Nemo fuit, cui hæc verba uberes lachrymas non excusserint, omnes enim eximiam illius sanctitatem mirum in modum venerabantur. At Quæstor metuens ne post obitum Rosæ de condendo tanti funeris thesauro lis inter Parochiam, & sancti Dominici Conventum exurgeret, nec ausus modestissimæ Virgini honorificum illud periculum aperire, ingenioso consilio dixit, obtinendæ apud Fratres Prædicatores sepulturæ desiderium potius mendicando, quàm testando innueret: quod ipsa præstitit, eum sui Ordinis esse morem existimans, & veluti indignam expelli se posse timens, nisi hoc infimis precibus impetraret. Sub vitæ finem crebriora Virgini fuere dulcissimorum raptuum in-

intervalla, quibus paratæ cœlestis gloriæ sapor-  
res jam delibabat, & iisdem gradibus, quibus  
debile corpusculum fatifcebat in mortem, ani-  
mus in vigorem, & securam hilaritatem attol-  
lebatur, adeò ut auctam in singulas horas læ-  
titiâ nec voce, nec vultu dissimulare jam pos-  
set. Paucis ante obitum horis ab humanarum  
rerum exilio in se regressa, P. Fr. Francisco Ni-  
ceto ingenuè, ac secretò dixit: Oh quàm excelsa,  
quàm pretiosa, jucunda, eximia tibi de suavi-  
tate Dei, de læta ipsius curia, de regione æter-  
nitatis narranda haberem: vado nunc cum tri-  
pudio ad perenniter contuendam pulcherrimâ  
illam faciem, quam toto peregrinationis meæ  
exilio quæsivi. Omni deinde officio parentes,  
quosque parentum loco habuerat, Gudisal-  
vum, ejusque conjugem, est prosequuta: tum  
germanos fratres sensim, deinde Quæstoris fili-  
as, tum reliquos domesticos efficacissima ora-  
tione ad amorem virtutis inflammavit. Media  
nocte clamor factus est, & Sponsus venit, quē  
Rosa vultu sereno, & hilari excepit: Germano  
fratri innuit se migrare, & cervical subtrahi  
jussit, ut capite ad nudum lignum acclinato de-  
libaret Crucis incommoda, & JESUS, JESUS me-  
cum sit, dulcissimè ingeminans ad illum  
evolavit.

ROSÆ funebris conductus, exequiæ, tumulus; ejusdem sepulchrum Ordinarii auctoritate mutatum solemnî Corporis translatione, & ingens fama sanctitatis.

**V**ividus faciei color, labia rubentia, & in risu diducta, ambiguum fecere adstantibus Rosæ mortē, donec adhibito speculo patuit nullum in ea superesse halitum. Tunc omnes repentino prodigio pervasit arcanus lætitiæ sensus, ac tota domus visâ est innatare gaudio nuptiali. Ex adstantibus una vidit numerosa Angelorum corona Rosæ lectum circumdari, eadēque juratò asseruit, ante felicem Rosæ transitum fuisse à Christo revelatum, Virginis mortem fore admirabilem, & sepulturam gloriosam, & vetuisse ne funeri circumponerentur panni lugubres, sed imperasse, ut nivei, quique triumphum decerent. Ac triumphantis quidem in morem deducta ad Tumulum Rosa fuit, namque vix dies illuxerat, cum ad Quæstoris ædes innumera hominum vis accurrit, mirantibus domesticis, unde, aut quo pacto nuncium defunctæ & calentis adhuc Rosæ tota Urbe diffundî potuerit. Circumfusi promiscuè nobiles, ignobiles, advenæ, cives, Indi, Hispani certatim Rosaria sancto Corpori applicuerunt: Hic flores vesti



vesti impositos diripere , hic vestis extrema ,  
hic pedes raptim deosculari. Tentaverant  
pluries oculos defunctæ Virginis obtegere ad-  
ductis palpebris, sed frustra , nam sensim rece-  
dentes liberum Columbinis pupillis aditum  
dabant, ut Limenses suos dulciter intuerentur.  
Nisi Prorex armatæ suæ custodiæ cohortem  
prætoriam eò destinasset , explicare se domo  
funebri pompa non potuisset; adeò turba in-  
numera compleverat atrium, ambulacra, & an-  
gulos omnes: Quin & plateas, fora, vicos, quâ  
transeundum erat, aliquot ante horis occupa-  
verat. Idè Archiepiscopus, qui prodierat fu-  
nus deducturus , ad Gundisalvi ædes eluctari  
diffidens, rectâ perrexit ad Templum Divi Do-  
minici, ibique ad valvas Virgineum funus præ-  
stolatus est. Interim sacra omnia Sodalitia, Re-  
ligiosæ familiæ confluxerunt, & ipsum Metropoli-  
tanum Collegium, præter morem ultrò adfuit;  
namque solum Archiepiscopos solet efferre.  
Accessit amplissima Curia Senatorum, qui ho-  
nos defunctis Proregibus præstari solet. Ma-  
tronarum ambitiosa pietas, & visendi ardor fe-  
nestras, pergulas, arcus occupaverat , & certè  
nunquam alias sic visa est universa Civitas com-  
moveri. Supposuit humeros feretro Capitu-  
lum Metropolitanum, deinde mutatis vicibus  
Curia Senatorum, mox Primores ex Religiosis  
Ordinibus. Feriebant sydera clamores, San-  
ctam asserentes Rosam, & nisi hastatorum bi-

pennes quasi sepe objecissent corpori, par illius exigua templo fuisset illata. Ut limen at-  
 rigit nova jucunditate exhilarescere visa est  
 Virginea facies, & in Sacello, cui à Rosario no-  
 men est, prodigiosa imago Deiparæ repente  
 fulgore insolito micuit, & manifestis lætitiæ  
 argumentis visa est excipere Rosam suam. Mox  
 cò confluit torrens ingentis populi, cūque  
 omnes viderint splendores insuetos; fuerunt  
 etiam qui suspicarentur, imaginem portentoso  
 sudore maduisse. Tumulum Rosæ circumside-  
 bant Patres dignitate, & senio graviores, tum  
 ne thesaurus ille diriperetur, tum ut eidem ad-  
 moverent debiles & claudos, qui spe obtinen-  
 dæ salutis accedebant, neque spe frustrati sunt,  
 ut consequenti capite palam fiet. Ponè consti-  
 terat hastata Proregis cohors, ut confusam mo-  
 lem irruentis populi distineret, si posset. Se-  
 pulchro tradere iacrum corpus destinabant  
 Patres, cū tanta insonuit populi vociferatio,  
 ut supersedendum fuerit, & nisi certa spe la-  
 ctatus fuisset populus, domum nemo se rece-  
 pisset. Sed turba, quæ templum infederat;  
 dilapsa, confluit alia, & Archiepiscopus nutu,  
 (namque vox audiri non poterat,) jussit cor-  
 pus Virginis in Sacristiam deportari; cūque  
 nec ibi esset in tuto, raptim inferri adytis No-  
 vitiorum. Ibi Archipræsul fusus in genua ma-  
 num Virginis devotè osculatus, eam in singulis  
 digitorum articulis, perinde ac si viveret, tra-

Stabilem sensit. Postridie laxatis templi foribus, & relato Virgineo corpore, undatim irruit admissus populus, neque incolæ tantum, sed & remotiores accolæ, qui à sex & ampliùs leucis accurrerant. Proregis milites impetum franare non potuerunt, ideóque omnis ætas, & sexus ad feretrum eluctari contendit: hic calculos precarios, alius sudarium, numisma, & quidquid ad manus erat, contingendo sacro corpori prætendebat. Turba languentium penè cum jurgio festinabat accessum, pueri per obstantium capita sublimes mittebantur ad contactum salutis, & vix ipsum corpus servari potuit, cum velis, capillis, & vestibus direptis sexies mutanda Rosæ fuerint indumenta. Resonabat undequaque templum perpetuis vocibus Sanctam proclamantium, & pulsu, ac tintinnabulis signum dabatur choro, cum respondendum erat Sacerdoti ad Aram facienti: sed nisi Cantores choro egressi ipsum Altare circumstetissent, consummata non fuissent divina mysteria. Antistes è throno progressus ad feretrum ultimam efferendi ad tumulum corporis pompam adornabat, cum iterum validioribus ingemuit clamoribus stipata turba, rursus densato cuneo undique irruit in suggestum, ideóque præsens periculum direptionis divertendum fuit oblata populo dilatione sepulture. Confirmavit spem pulchritudo, & suavolentia virginei corporis, quæ nullum fore

periculum spondebat, si vel in plurimos dies publico conspectui superesset. Per sex horas supra triginta idem perstiterat oris decor, oculorum patentium fulgor, & candor manuum: Nulla infederat vultui fuligo sub aëre tam humido, calido, & ex concurrentium refluxibus pulverulento. At mirifica cœlestis odoris fragrantia spirans à sacro corpusculo post decem & novem menses recreavit illos, qui exhumatam Rosam nobiliori sepulchro crediderunt. Sub meridiem clausis templi foribus, & elusa spe populi redituri, conditum est Rosæ corpus in præparata è Cedro arca, & in æde Capitulari sepultum. Ut primum fores patuere, irrui unda populi, & Sanctam inclamans, pulverem sepulchri, terramque certatim asportavit. Indè continuò fluxu rhedarum, paterna Rosæ domus frequentari cœpit à nobilibus viris, qui hortensem cellulam venerabantur, quam Virgo solitudinis studio inhabitaverat. Eximia prodigia, quæ palam crebrescebant, mirum in modum commendabant populo sepulchrum Virginis, cui nondum videbatur exhibitus debitus cultus. Idcirco solemniore instaurare exequias (quibus ipse Prorex interesset,) statutum fuit, cumque diu inter illum, & Archiepiscopum amica quæstio agitata fuerit, eò quòd præstituta dies, & sæpè variata, semper alterutri incommoda accideret, tandem ambo in quartam Septembris convenerunt, omninò inscii eam S.



Rosæ Viterbiensis honori dedicatam esse. Tota iterum sedibus suis emota Civitas templum implevit, & dum Sacerdos Numini commendabat Rosam, voce non impari sese populus commendabat Rosæ, cujus fama celeberrima brevi totius Regni oppida permeavit. Potosi trecentis leucis Lima dissitum, in communem gratulationis impetum efferbuit, sonuere in turribus æra campana, micuere luminaria, & tota passim regio Peruana Rosam celebravit; à qua cuncti populariter sibi suffragium pollebantur: Neque tractu temporis elanguit populi ardor, namque miraculorum celebritas, & multitudo in dies ad invisendum Rosæ sepulchrum plures accersebat, ideò cum tota Urbs, & vulgus pariter, & utriusque ordinis Principes, assererent Rosam communem Limesium thesaurum publico deberi, Archiepiscopus omnium ardentissimo studio libenter annuit, & initio 1619. prodiit è sepulchro Virgineum corpus incorruptum, suavissimum odorem inhalans. Celeberrima pompa delatum fuit in templum, ubi egregius orator de admirabili Rosæ Sanctitate verba fecit, ac tandem illata Virgo fuit cryptæ ad dexteram summi Altaris, ubi cum nimium glisceret populi turba (namque omnes ad sepulchrum Virginis velut ad secundam aram subito convergebantur: hic perpetuus tumultus erat offerentium vota, suspendentium anathemata, deponentium scipiones.)

consulendum fuit reverentiæ sacri Tabernaculi, translatis exuviis Rosæ in Sacellum S. Cathari-næ Senensis. Interim Limam pervenere lite-ræ Apostolicæ, quibus authorati Judices Tri-bunal ex formula sacrorum Rituum erexêre, ut examen instituerent de vita, & gestis Ancil-læ Dei, Sororis Rosæ à Sancta Maria. Adfuêre 183. cumque solùm superesset inspectio Reli-quiarum, delegati ad hoc munus repererunt, Virgineum corpus expleto post obitum anno ferè jam quintodecimo, ossibus integris, & sic-ca hinc inde carne obductis, spirans odorem, quo fragrant siccatae ad Solem Rosæ. Hinc au-lam Capituli adiêre lustraturi primùm Virginis sepulchrum, è quo certatim fideles hauriebant pulverem ad varia morborum genera depel-lenda; cumque non nisi quinque pondo terræ visa sint eruta, aliunde constitit complures modios ex illomet foramine fuisse effossos. Sed cùm exinde Procurator Generalis Ordinis Prædicatorum admonuisset Limenses Patres, habendam esse rationem Constitutionis Urba-ni VIII. qua Viris nondum albo Beatorum ad-scriptis Apostolica authoritate publicus honor interdicitur, illicò intempestivum cultum Ve-nerabilis Rosæ abolendum censuerunt, Popu-lus sacellum questibus implevit, & sparso in vulgus rumore, clam in Hispaniam delatum esse Rosæ corpus, non leve periculum immi-nuit Religiosis viris, qui non sine labore com-pe-

p̄secuere turbas, ostendentes, ita consulendum  
 illustrioribus Rosæ honoribus, qui ab Apostoli-  
 ca Sede sperantur. Et his quidem præludit exi-  
 mia fama Sanctitatis, quæ omnes rapit in ad-  
 mirationem Rosæ. Nimium quantum pro-  
 tenderetur hoc qualecumque Compendium, si  
 elogia præstantium Virorum hic subnecteren-  
 tur. Non tantum sacra D. Dominici Familia  
 literis communi nomine datis, Sanctam illam,  
 admirabilem, clarissimis illustrem miraculis, &  
 prophetico spiritu, inque omnibus D. Cathari-  
 næ Senensi supparem dicit, sed & Limense Cœ-  
 nobium Patrum sanctæ Mariæ de Mercede, &  
 Nicolaus Mastrillus Duran Provincialis Socie-  
 tatis Jesu communibus suorum votis, & Sacer-  
 Ordo Joannis Dei, & PP. Eremitarum S. Au-  
 gustini, & Minorum S. Francisci, & Ecclesiæ  
 Metropolitanæ Limensis nomine datæ literæ  
 Summum Pontificem infimis precibus exorant,  
 ut in Sanctos referat Rosam, & tutelarem Li-  
 mæ concedat; Ejus virtutes enumerant, ac no-  
 tissimam Sanctitatem, & admiranda prodigia.  
 Addenda hîc esset relatio perhonorifica, qua  
 Eminentissimus Princeps Decius Cardinalis Az-  
 zolinus in sacra Rituum Congregatione coram  
 Sanctissimo D. N. die 15. Septembris 1663.  
 Rosæ virtutes enumeravit, & supplices literas  
 novem diversorum Ordinum, ac Illustrium  
 Virorum Limensium, tres Regis Catholici, tres  
 itidem Eminentissimi Card. de Aragonia, & bi-

nas Magistri Generalis Ordinis Prædicatorum, & perseverantiam, & augmentum famæ sanctitatis, & devotionem Populorum, quam amplificatam dicit miraculis supra centum novemdecim ex processu remissoriali auctoritate Apostolica confecto.

## C A P V T XX.

ROSA post mortem, & sæpissimè, & multis apparet gloriosa. Eadem, in scelestorum conversionibus, & obstinatione cordium emollienda mirabilis.

**P**Ræfari libet, hæc etiam quæ consequuntur, prodigia ex authenticis processibus Signorū Gratiarum, & Miraculorum fuisse delecta, Aloysia de Serrano ut sæpissimè Rosam immortalem vidit, ita semel præsertim inter agmina Beatorum à Deipara Virgine deductam ad solium divinum, & immensæ gloriæ corona decoratam. Testatum reliquit coram Apostolicis Judicibus Quæstor Gundisalvus, viginti & duabus vicibus S. Viro conspicuam fuisse gloriam Rosæ, quæ pariter Doctori Joanni del Castillo videndam se præbuit in fulgidissimo lumine, rosæ undique circumdatam. Deinde verò plusquam quinquagies eidem illuxit, multa, ac sublimia illi edisserens de felicitatis suæ excelsio fastigio; quin idem in postrema depositione



anni 1663. persanctè asseveravit, integro sex  
mensium spatio interdiu, noctuque se divini-  
tus admissum ad tantæ beatitatis spectaculum,  
ac deinde cœlesti Ephæbo à Rosa imperatum ut  
suas vices obiret. Quàmplurimis aliis notæ  
Sanctitatis Rosa videndam se obtulit, nunc in  
Cœli viridariis cum Christo perambulans, nunc  
eidem Limanam Urbem, & Regnum Peruanū  
commendans, nunc vultu hilari, & jucundo  
nutu probans ea, quæ referebantur in tabulas à  
Quæstitoribus virtutum suarum, nunc adornans  
conclave, chartam dirigens, & graphiaria in-  
strumenta Notariis disponens, excepturis ea,  
quæ testes proferebant in commendationem  
sui, & ridenti ore visa gratiam pro obsequio  
sibi exhibito spirare. Fuit etiam quæ nocte  
concubia hæc verba audivit: Rosa verè Sancta  
est, quibus confirmata sunt ea, quæ de Rosæ  
Virtutibus juratò protulerat. At Didaco Hy-  
acintho Paceco, qui ex quotidiano hypographi-  
cæ artis lucro victitans jussus fuerat in causa  
venerabilis Rosæ bis mille folia processuum,  
seu actorum intra certum tempus scribendo  
absolvere, jamque desperabat se oneri parem  
fore; adeò lassabantur digiti, stupebat brachiū,  
divaricabantur nervi, in somnis Rosa se scribæ  
suo exhibuit, & leniter accedens dexterum ja-  
centis brachium comiter arripuit, validè strin-  
xit; & evigilans Pacecus scripsit ab aurora ad  
occasum Solis, nulla digitorum lassi-

tudine, nullo cruciatu nervorum, brachio levissimo, & supra modum expedito. Perrexit deinde reliquos dies scriptioni laboriosæ citra laborem impendere, attonitis quicumque Pacecum noverant, ejusque pulcherrimum characterem tot chartis illitum viderunt. Decumbabat in Limano Cænobio P. M. Augustinus de Vega Ordinis Prædicatorum, tunc Peruvix Provincialis, jamque de hominis vita conclamatum erat, cum Rosa Christophoro de Ortega suis in ædibus dormienti imperat primo diluculo Cænobium adeat, & Provinciale moribundum conveniat, denuncians, nequaquam illum tunc è vivis abiturum, sed aliquamdiù sub Episcopali infula in vinea Domini laboraturum, quod re ipsa contigit. Celeberrima peccatorum apud Deum Causidica, ut convertantur, & vivant Rosa fuit. Quamplurimi ad solum Virginei corporis in feretro contractum ita fuere compunctionis stimulo perculsi, ut ibidem cæperint coram populo elatis vocibus sua scelera detestari, & inter hos nonnulli juvenes liberioris vitæ, qui eo solum consilio venerant, ut defunctam pulcherrimam Virginem intuerentur. Successivis deinde intervallis ad Mariam de Oliva Rosæ Matrem ivere complures, etiam ex Religiosis Ordinibus, ut illius egestatem aliquo subsidio recrearent, professi hoc se tributum pendere Rosæ, cui debebant felicem suæ vitæ permutationem. Quidam profligatæ

con-

conscientiæ vir nunquam toto sacrilegæ vitæ  
sue decursu ritè confessus, at alterius pietate  
Rosæ commendatus, ab annoso conscientiæ le-  
thargo evigilavit, adeoque animum, quem cal-  
lus obduxerat, timor Domini emollivit, ut de-  
inceps umbram sceleris horruerit. Ex concor-  
di plurimorum, qui confessiones exceperant,  
testimonio liquidò constitit, post imploratum  
Rosæ in Cœlis auxilium innumeros tum Limæ,  
tum in universo Regno ex abyssò scelerum e-  
meruisse; quod beneficii genus inter validiora  
solidæ Sanctitatis argumenta ex communi san-  
ctorum Doctorum sententia, meritò compu-  
tatur. Quid quòd Limæ paucis à Virginis o-  
bitu diebus tortilia disciplinarum flagella, seta-  
rum cingula, & variæ fortis cilicia ob emptorū  
multitudinem subito defecerunt? Insignes pec-  
catrices luxuriæ nodis exutæ in calle Virtutis  
constantem fixere pedem: in universa Peruana  
regione Sacramentalis pœnitentiæ administræ  
communicatis indiciis adstupuere tantam mo-  
rum mutationem in populo à die, qua Rosa in  
Sponsi sui Regno cœpit agere causam Civium  
suorum. Fœminæ certatim abjecere, vestium  
luxum, Religiosa claustra cruentis flagrorum  
ictibus perpetuò personuerunt, Confessariorū  
ubique sedilia planctu & gemitibus sunt obsessæ,  
& vir gravissimus juratus asseruit, ex quo Peru-  
via nostris detecta patuit, nullum inclaruisse di-  
vini verbi concionatorem, qui tam universa-  
lem

lem pœnitentiæ spiritum, & luculentum pietatis incendium excitaverit. Et egregiæ quoque virtutis viros ad studium sanctitatis accendit, veluti Patrem Joannem de Villalobos Rectorem Tyronum Societatis Jesu, qui cum à mortura Rosa postulasset, ut se traheret in odorem virtutum suarum, ab ejus obitu sensit arcanas cordis sui unctiões, & stricturas insolitas luminum divinorum. Quid quod & quocunque libitum illi fuit, Rosa pertraxit animos rebelantes? Mariam de Xuara fœminam prædivitē, & opulentam implacabiliter averſam privignis suis Francisco, & Alexandro de Coloma, & eorum octo consobrinis pauperrimis, ita emollevit exorata à Francisco, ut consequenti mane illicò martertera resciderit testamentum, quo aliis omnia sua legaverat, & hæredes exasse scripserit, quos antea oderat mirum in modum: Ludovica Barba vix non exanimis concidebat, cum audiret à Confessario suo divinitus inno-ruisse Rosæ, quod ipsa religiosum habitum esset aliquando indutura; sed illicò à morte Rosæ Ludovica exarsit ambitu sacræ vestis, quam antea veluti Medusæ vultum horruerat. Alteram Ludovicam de Mendoza incertam, ac de Rosæ sanctitate animo fluctuantem, repentinus angor invasit, adeò ut manibus, pedibusque mutilatam se crederet: gravior ejusdem spiritum caligo, ac tempestas mentem obsedit, ac turbatum cor quodam veluti terramotu succuti cœpit;



pit; quæ omnia evanuerunt statim atque clatis vocibus intonuit: Rosa verè Sancta est. Uisque adeò pro Sponsæ suæ honore zelabat Sponsus ille divinus, cui venti obediunt, & mare.

CAPVT VLTIMVM.

ROSÆ defunctæ attactu, odore, veneratione, mors, morbi, pericula depelluntur. Ejusdem cingulum, vestes, sepulchro exemptus pulvis, & pictæ imagines phre-  
nesim, cancrum, lepram, & omne morborum genus mirabiliter curant.

Quamvis perpetuum prodigium fuerit Rosæ vita, innumeris illam ad aliorum salutem miraculis decoravit Deus, quæ si omnia percenterem, procul à compendii legibus iret historia nostra. Præstantiora quædam sufficiat indicasse; inter quæ principem locum tenet revocata ad vitam Magdalena de Torres filiola semestris Gregorij Agricolæ, quæ cum exanimis à vespere ad usque posteræ diei lucem jacuisset, jamque paratus effodiendo sepulchro sarculus adstaret, attactu vestis Rosæ illicò viva, & sana in lecto confedit. Antonius Brantibus mensibus cum febris, & angore pectoris congressus, tandem jacuit sine motu, anhelitu, ullòve vel minimo signo vitali, nec vellicatione vel

vel pulsu ullum à gelido corpore potuit extundi argumentum superstitis vitæ, quam tamen post aliquod tempus in corpus revocavit Rosæ ab adstantibus implorata. Dum in templo superfuit virgineum corpus quàmplurimis manifestam salutem attulit, veluti Elizabethæ Duran, cujus brachium à multo tempore siccum, & inutile humana ope curari non posse, Medici statuerant: Et servus Æthiops qui dexteri brachii, manusque usum explicæ, & nervorum attractione amiserat: Et Georgius de Aranda Presbyter qui ob excepta in sinistro brachio vulnera in bello Chilensi, sanie, convulsione, ac tumore attractam manum, vegetam, sanam, & flexibilem reperit: Et Alphonsus Diaz mendicus toti Limæ notissimus, qui humilix nixus fulcro manumque & pedem ex attractione inutiles per solum trahens, illicò exilivit in pedes, postquam ad Rosæ tumultum oravit: Adrepserunt & pueri duo Æthiopes quorum alter nec palmum à terra erigere se, alter virgillis utcumque librare se poterat, & Rosæ beneficio extemplo incolumes duxere per templum choreas. Pueros quamplures variis morbis implicitos repentè Rosæ incolumitate donavit, ideoque certatim de manu in manum porrigebantur, ut ad salutiferum contactum pervenirent. Quid porrò enumerem revocatos à faucibus mortis adhibito cingulo, velis, particulis vestium, aut aliis, quæ pia sedulitas

Rosæ corpori admoverat? Nullum penè genus ægritudinis esse reor, quo aliqui pertentati salutem Rosæ non debuerint. Et capite laborantes, & intolerabili cruciatu dentium, & oculis aliquamdiu capti, & gangrena perusti, lepra, impetigine, apostemate, arthritide, hydrocephalo, angina, ad ultimum vitæ discrimen adducti: Et ex alto in profundas foveas prolapsi, & ab equis super irruentibus oppressi: Et qui mortem hauserant in poculis venenatis: Et quibus non nisi ad dolorem & onus luxata brachia, pedesve supererant. At quos urebat ardentissima febris, tam præsentem Rosæ opem experti sunt, ut omnem adnotandorum diligentiam superaverint, & Joannes Lobo Presbyter sacramento coram Judicibus firmaverit, se diversissimis locis Chuquisaquæ, Potosij, Oruræ, alibi flagitantibus promiscuè omnis ætatis, sexus, conditionis infirmis præbuisse potum vivificæ terræ, exemptæ sepulchro Rosæ, & illic in omnium conspectu ferè innumera curata fuisse languorum genera, & febres præcipuè latim abactas. Pepercerat hæc terra prodigiosè corpori Rosæ, namque cum Limenfæ Cœnobium trecentos numeret Religiosos viros, ut aula Capitularis excipere possit omnia decedentium cadavera, ex agro Panamæ adventa gleba fuit tenuis, soluta, arenosa, & innato calore subtiliter vorax, quo extemplò resolvat, ossum duritiem, & ingesta funera absumat. Mi-

rum dictu! unico, totoque illo spatio, ubi sacrum Rosæ corpus immissum fuit, gleba mutavit indolem, ac ferè pumicea soliditate in se coacta obduruit, ut solum ibi digitis, leviq̃ manu teri, aut frangi nequeat, quin ferro opus sit ut excavetur: non sic reliqua illius cœmeterii suburra tritu facillima, tractabilis, fluida. Porro in hoc Rosæ Cœnotaphio ad perenne humani generis beneficium viva salutiferi pulveris scaturigo latet, quod præsertim patuit anno 1632. cum post exportatos inde, totoque Regno distributos terræ cophinos, vix tria, vel quatuor pondo cavo scrobiculo eruta visa sunt. Et cum P. F. Bernardus Marques paucis ante diebus totum immisisset brachium foramini, paulò post succrescente intus pulvere, vix manum immergere totam potuit. Sexenni Virgini musculos gutturales inflammarat synnanche, & Chirurgus ulcere inspecto negaverat puellâ curari posse, namque gangrena se plagæ insinuaverat, & erosæ carnes frustillatim ulceri excidebant: atque indies serpebat malum. At epoto salutifero pulvere convaluit. Ab annis viginti Abbatissa Monasterij S. Claræ miserissime torquebatur ex inflatione tibiæ, in qua sparsim plusquam quadraginta ulcerum hiabant orra, sed & febrim per viscera sævientem extinxit, & vulnera clausit pulvis hic salutaris. Sed quid singula enumerem? Fœminas præcipuè puerperii doloribus tabescentes præsentissimo



auxilio Rosa sapissimè recreavit, idcirco quamplurimis pueris, ac puellis, additum fuit cognomen de Rosa in perpetuum beneficii monumentum. Ipsa natura voluit aliquando superesse mnemosynon beneficii à Rosa collati, veluti in Petro de Quixano, qui cum transversum actus in utero matrem exanimaret, ope Rosæ prodivit statim, pictam gerens in dextera palpebra Rosam. Et aliàs huic novi Orbis Thaumaturgæ obtemperarunt mutatæ naturæ vices, ut quando tauros ferociter irruentes compescuit, & piscibus imperavit, ut in retia confluerent, & puellæ decenni, vires addidit, ut pondus erigeret, cui quatuor robusti bajuli impares fore credebantur. Quin etiam mentem aliquibus ab ejus statu dimotis illicò redonavit. Hinc universæ Peruviae incolis commune studium fuit, in prodigiosæ virtutis memoriam passim per ædes, Rosæ effigiem habere, cujus osculo quamplurimi cum morte luctantes, enormiter laucij, per humum solutis membris repentes, salutem illicò receperunt. Ex his imaginibus aliquæ pallentem Rosæ vultum referentes, visæ sunt venustè in genis rubere, & blando fulgore hilaritatis suæ, omnium animos accendere ea die, qua publicè perlectæ sunt Apostolicæ litteræ compellentes undique fideles ad Rosæ prodigia sacris Judiciis deferenda. Horum admirabilem & copiosam nar-

rationem qui velit, consulat Historiam de Venerabilis Rosæ vita, elegantissimè, & ingeniosè contextam à R. P. M. Leonardo Hansen Provinciali Angliæ Ordinis Prædicatorum.

F. Antonius Gonzalez.



IN

In Honorem & Laudem

BEATÆ ROSÆ  
ORDINIS S. P. DOMINICI  
TERTII ORDINIS

Beatificatæ à Sanctiss. Domino Nostro

CLEMENTE IX.  
PONTIFICE MAXIMO

Quem Deus Summus, Optimus, & Potentissimus, longævè tueatur, & clementissimè conserveat.

ROSA.

Ex Ethymo, rore cœli fata dicitur. (a)

(a) *Secundum Nostrum Eximium Magistr. P.F. Bernard. Luxemburgensem Serm. 1. de Rosario olim Theol. Profess. Colonia.*

**D**Vm ros, Te Cœli, benè dixero, gratia Christi,  
Tam magnam fecit, *Virgo, Beata, Rosa*, es.  
Hoc benè perpendens, *Clemens* nunc *Papa* gubernans  
*Nonus*; proclamat, *Virgo*, *Beata, Rosa*, es.

Monodisticha.

Alludentia ad Rosam naturalem, & Beatificatā.

1. **T**erra rosas profert, cunctos, sed sydera, flores;  
Hos inter flores; nunc *Rosa nostra* viret.
2. Quem *Rosa* Virgineo vidisti lumine Sponsum,  
Æternum cernis, *lumen*, ad essetibi.
3. Fert

3. Fert Rosa nunc spinas, sine spinis condita quondā, (b)  
Nostra caret spinis, jure, *Beata Rosa* est.
4. Non semper flores fragrant, nec lilia spirant;  
Fragrat at æternum, dicta, *Beata Rosa*.
5. Est DEVS ipse *Rosa* (c) est *flos* selectissimus, *Orbis*;  
Hinc sibi dilectas *quarrit* habere *Rosas*.

(b) *Sententia SS. PP. Ambrosii & Basilii in suo Hexam. ante lapsum Adam roseam fuisse sine spinis.*

Super hoc distichum Amice Lector brevem, accipe glossam.

(c) Cant. 2, cap. 5, v. 1. sic ait Scriptura. *Ego flos campi, & liliū convallium.* Alia litera legit, *Ego sum Rosa Saron.* Hoc est prout glossa Francisci Vatabli habet *Rosa saturata.* Solus Deus satiare potest, Summum enim & omne bonum est. *Qui replet in bonis desiderium tuum.* Psal. 102. 5. Et antecedenter dixerat Sanctus Rex, & Magnus Propheta David. *Satiabor cum apparuerit gloria tua.* Psal. 16. 17. Ob hoc dicitur DEVS Hebræis, *Sadai*, id est *satians*, plenissime.


Ergò


BEATA ROSA ora pro nobis, ut de Labyrintho, Spinis, & Spinetis, immundi mundi, ad Roseta Cæli & Paradisum tui dilectissimi Sponsi JESU CHRISTI perveniamus, & illo æternum fruamur. Amen.

P. M. F. A. B. O. P.

FINIS.







BA671

G643a2





